



屏溪先生集 二十五

碣銘

共三十

~ 16
2419
25



2419
30-25

屏溪先生集卷之四十九目錄



墓碣

訓鍊正 贈兵曹參議李公 德男 墓碣銘

郡守趙公 鳴國 墓碣銘

進士李公 光益 墓碣銘

同知中樞府事李公 著命 墓碣銘

直長洪公 義人 墓碣銘

掌令崔公 益秀 墓碣銘

縣監 贈判書金公 季珍 墓碣銘

僉知權公 養性 墓碣銘

贈持平李公 旺墓碣銘

黃君 時憲墓碣銘

府使尹公 是勇墓碣銘

屏溪先生集卷之四十九

墓碣

訓鍊正 贈兵曹參議李公 德男墓碣銘

昔在 萬曆壬辰我 宣廟命薦將帥才大臣柳公
成龍以李忠武及公應之公姓李諱德男字潤甫遂
用薦陞訓練院正己而罷官歸安城舊居夏倭奴大
寇公聞即馳覲 上己西狩無船可渡漢公臨江痛
哭奮恨慷慨欲歸收義旅路龍仁逢抄賊手格殺十
餘乃與內舅洪自修募鄉人鑄農器為兵方勇前抗
賊自修子季男脫死於懶川之敗來會焉季男勇士



也相與遇賊於獵屯嶺下至青龍洞公躍馬先登季男繼之一場廝殺斬獲五十餘級懸之嶺上賊勢挫創軍聲大振畿湖響合兵至三千餘人築土城於木村以遏賊衝安陽以西賴而安堵公整勵義卒東北至左贊嶺大破賊兵又南至于從涪野約湖西軍并力擊之兵纔交湖西軍先潰公奮不旋踵血戰力竭與自修死之實八月二十四日也賊以公首懸旗竿爲泄憤怨時季男係官在隋城聞之馳入賊中奪得其父與公屍葬公於木村陣壘下乾坐之原 宣廟聞公死義之錄功 賜復祿百二十二年 肅宗癸

巳特旌其閭又四年丁酉 贈兵曹參議公性至孝八歲失怙恃日上墓號哭涕泣所着地爲不毛人以王褒之枯栢同稱公勇力絕人善馳射弱冠登武科平武至訓練副正所歷皆清選公永陽人麗大將軍諱大榮爲鼻祖八代祖寶文閣大提學釋之子安直直提學安直子宗儉副提學其後世有官冕祖諱仁佑考諱守訥皆參奉妣洪氏籍南陽父 贈左尹清南城君錫曾孫公配某郡某氏其父某有一男元信軍資參奉二女適正郎李廷明僉知林好禮參奉生時龜時龍女黃後堅妻時龍無後時龜生天錫天錫

屏溪集 卷之四十九
生世懋世懋生重變重變生基周六世皆獨子也嗚呼公以散班一武夫人無分符軍民之權真唐帝所稱不識何狀而乃能首先倡義爲人路義旅之前茅青龍左贊之捷磊落奇壯末又大節卓乎山岳則歷選中興勳節未之或多而况其爲忠以孝爲本非一時意氣激慨而成者實能盡夫所畀之天也是謂之仁勇人者非耶惟其身後褒贈僅加一級子孫不絕如線又貧窘顛頓無異負薪之困天人之報施如此其何以爲爲善之勸耶然公之志純於爲國他不暇顧此皆不足爲公憾也夫何言哉銘曰

石壘雲埋衣履寔藏霧旗風馬靈氣徜徉澗灘勦賊古壘是傍雷厲電擊儻有陰相一方欽誦豈止苗裔毋穿毋致忠臣之瘞○癸酉夏余撰李將軍碣銘粵一年冬有同時死義人洪自修後孫者來見爲言碣銘之爽實蓋其請洪將軍季男碑文時原記獵屯之捷專功於洪氏公則無與焉且聞自修忌日在十月公既與之同死則忌日之相左大可疑余不覺瞿然更徧考前人文蹟李氏後承單鮮無家傳文字其可憑信者皆出自洪氏最是洪將軍祭公文首稱公起旅之義以爲義聲大振遠近響應又曰弟自懶川亦

往依焉公首事獵屯莫證於此也季男兄弟復讎之
檄其子世憲手書譜冊者皆明言公與自修同死從
涪之戰然兩家忌日各在數朔之遠誠事理之外也
但其祭文持說賊揭竿公元事繼言狼心無厭徧燒
公家蓋賊先害公又怨公斬殺之多旋屠公家燒蕩
之祭文爲言此也翌年癸巳淑人金氏以奴名呈官
始成付火公文而賊來燒燼實壬辰八月十六日云
公忌之在其前三日明有可信洪家之忌之不同未
知何故而本不足爲病於公惟後人合商之也嗟呼
公本與季男同事旋死於戰大功未集季男則畢竟

成就誠可偉矣然首先倡義實在於公只以季男所
成之大益與其首事之實而沒之豈非所謂不能通
知二父之志者耶可惜也已翌年初夏追書

郡守趙公

鳴國

墓碣銘

余生長漢師之城西與公同閉居余時童子遊公已
老蒼措大余雖後公七歲不敢肩隨而公則弟畜相
愛者淡旋各星散間值相對輒款款有故遊情也及
公歿公子翼彥以長胤命來曰子吾先人友也先人
墓無碣願子之銘之也余感舊傷今不能以拙蕪辭
按公諱鳴國字吉之趙氏自高麗判院事岑始籍楊

州我朝有末生領中樞府事諡文剛簪裾相襲至
諱之柔績學潛德即公會祖也祖諱相禹號時菴學
於沙溪金先生以學行名世元宗追崇丁卯和議
皆抗疏極論忤旨抹殺孝廟朝始拜寢郎考諱
爾炳官掌令當肅廟初服時事大變以正言上疏
極言之尤菴先生特書以獎之妣池氏師傅鳳輝之
孫通德郎性淵之女公以崇禎後丙辰五月日生
八歲遭外艱又三歲失恃守制如成人見者莫不嘉
歎公幼聰悟有秀才未成童經史皆目寓心解早遊
黌舍屢占魁等聲譽日播二十四取司馬試自此人

朝夕期大闡竟不得則命也甲午除康陵參奉
例遷至奉事直長己亥陞主簿旋移金吾郎庚子又
移秋曹以事坐罷罪該同案公不自白知者皆多公
焉即拜懷德縣監親嫌遞又拜監察翌年出監新昌
歲大歉民多顛連公至開獄門寬逋負移粟以濟民
飢縮俸以蠲別賦民誦之是年冬鏡黨用事宗國
將禍公曰此豈仕宦時耶遂移疾辭歸縣民奔走借
寇終皆垂泣惜去爲政半年惠政之入人深如此公
小築于溫陽之先壟下時李公舉東尹晦甫焜講學
於巍巖之上公杖屨過從或講難文字或徜徉水石

迨然自適若將終身焉乙巳今 上新政公復入秋
曹曹有李範疑獄久未決曹長專靠公公按覈未幾
罪人自服一曹嘖嘖稱公威明丙午爲歙谷縣令自
此歷天安安山韓山郡守其爲治一如新昌時在安
山當壬子大飢方僂聚穀廣設賑具境民無飢色他
邑之聞風來哺者皆一視接濟方伯繡衣皆褒 聞
之湖南御史亦訪於沿路而上之至蒙 恩賞丁巳
從子泰彥以諫官重觸 天怒終謫海島聞者魄褫
時公赴韓山纔數月即棄歸鄉廬公在桂坊 春宮
方三歲睿姿早成已學孝經公參講 書筵釋告字

句必有理致又於習字必隨手導諭 春宮後以所
習字各賜宮官公不勝忭喜作詩贊嘆諸僚皆和之
一時稱美事焉公居閒日以經史自娛名其所居堂
曰省菴蓋取曾子三省而齋曰秉燭亦老而好學之
意其素志可見也癸亥公年六十八公哭怙之回甲
公慟慕若袒括初泫然泣曰追服禮所不言雖不敢
徑情行之頑不滅死又見此歲吾豈忍食肉衣帛言
笑嘻噫若尋常爲哉遂居處飲食一依憂制執禮甚
固纔數朔氣日枯而病已奄奄矣一日強疾盥洗就
拜祠堂及卧牀席仍就盡焉即其年五月十三日也

公孝友其性也屢典郡邑每淡不暨之痛請於伯氏
權奉祠宇於任所晨謁暮審若定省禮喪餘必齋沐
備物必躬檢及祭必盡哀事伯氏如事父親愛篤至
在官服食供養必誠謹蓋公王考時菴公叔父佐郎
公爾翮俱以孝 贈官旌閩伯氏公鳴時從氏公鳴
周亦皆以孝至 聞於朝公之篤於倫彝者儘有所
自來矣且佐郎公移孝之忠居 顯廟方喪情文無
異私憾竟以致命公七十追喪終不勝哀以聖人滅
性之戒言之俱不能無過或近於屈原伯奇之忠孝
而其純篤之誠真所謂加於人一等也亦公之家法

然也歟處世則恥與人滄滄熱常退低一頭而不歉
也居官則廉白之操至使妻子飢餒而不顧也謹辭
受之嚴則如婦家之科後別券終不屑也恤窮困之
甚則自己之所喫着無難施與也此豈非衰世之至
難得者耶公配綾城具氏父僉樞文重領議政致寬
之後幼孝事父母及歸公常以未逮事舅姑慟恨焉
性廉謹平生不以一毫累公清德先公十年亾其生
甲子一周葬于龍仁之負兒山下從掌令公兆也生
四男宅彥錫彥翼彥得彥季天側室一女幼漢慶屋
慶女李最熙洪彥祿妻長房出胤慶女李克大尹宣

國妻仲房出晚慶憲慶箕慶宜慶女李永源妻叔房
出三房五女幼漢慶子顯詰內外孫曾男女總若干
人銘曰

雪鵝西去花川午原高三尺封寔孝子墳人之好是
孰敢不式世爭利焚公韞如玉世方慾昏公清如冰
伊孝既篤百行是膺松翠人望時翁攸藏魂氣流通
肖孫覲往特撮其大有銘鑄石詔今與後警彼頑濁

進士李公光益墓碣銘

記昔辛丑冬余新任文城上舍李君謙之自松禾携
童子子踵縣門告余曰謹以子托焉蓋君於寒水先

生有江漢秋陽之思以余學於先生為易以教之也
時世禍彌天余即棄歸溪上童子既弁從遊久今以
狀君者示之泣謂余先人墓木已拱無顯刻願子之
銘之余初見君已知為學行士而後來往復論禮者
多亦知君用工有據守也心固識之於其鑄隧之役
不可辭况孝子之意豈忍終孤耶君諱光益謙之其
字進士諱徽之子妣高敞吳氏 贈承旨瑞雨女君
未生進士公指腹定為仲氏通德郎岑之嗣君自
幼有孝友行事所後妣姜氏一如所生奉養盡愛敬
式好兄弟至老不少衰力學通經義善詞賦辛卯中

原漢集卷之四十九
司馬試丙申冬爲道儒首疏請金文元享紹賢書院
得津請昔栗翁勅院於石潭祀朱夫子以靜庵退溪
配之後追享文成蓋如滄州之祀道統也至是君往
稟于江門有此疏議疏時有欲以朴文純并請者君
以爲文元則曾有宋文正定論只今舉而行之而已
其議遂止前後居憂戚易備盡每日晨謁終身不廢
嘗曰喪禮從先祖世多傳襲非也事有不可不改而
必曰從先則終無可改之日其可乎遂議之門內尊
長生朝則舊祭而今不祭時祭則前不行而後行如
考妣之同卓合設非禮之甚本時王之制而我東之

通俗也雖諸先生講禮之家尠克改革君亟從各設
之禮斷行無疑饌品一用要訣君於禮可謂好之篤
也晚又喜易圖書奇偶之數揲著掛扚之法莫不究
詳晨夜每誦五贊輒畱音玩索曰非朱子極深研幾
其自然之妙何以形容若是耶李氏籍全義始祖諱
棹佐麗太祖位太師有丘直事我朝官戶部典書
自是世趾其美至五代祖儼武科歷戶兵刑郎卒官
北兵使諱敬臣贈執義諱源贈承旨諱碩馨
贈參判於君爲高曾祖也姜氏籍晉州其父遇昌君
生於癸亥正月某日甲子僅一周而沒於閏四月十

六日恭人首陽崔氏世斗之女稟性溫雅操履純詳事舅姑以誠愛敬夫子如賓禮婦道咸備戊戌君邁癘幾殊恭人中夜沐浴禱天願以身代病終勿藥其誠格于天如此辛未五月初四日沒享年七十三君葬海州松山丑坐原恭人附焉先兆也有二男四女男長仁默即謁銘者文科方佐幕海西仁點早天邊秦國閔省修鄭若李時熙婿也都事始無嗣取再從姪範華爲子後生一子範叙範華文科以承文正字天範祖範宗仁點出及都事生範叙君與書曰生生之理甚奇幸然嫡則當用範華實胡文定遺法也嗚

呼君天資恬清制行恭慎處心純謹物我無甚存衣取蔽體食取充腹不欲華美少遊科屋輒居上游人朝夕期大闡辛壬以後義理益晦絕意世事不復進取計惟讀書窮理爲己分事無求於世真其爲人寡欲也俞相公拓基爲海伯時追聞君實行以不得薦聞爲歎云銘曰

凡世爲士其道多歧聰明才辯豈不無之實心實行如君罕得一覲江門可謂善學先生之學以實爲主君於三席周旋若久聞所未聞見所未見以實其學其就曷限旣志其篤咲業未卒用示來後我書其碣

同知中樞府事李公 著命 墓碣銘

同樞李公我尹之自出也與我先君子有媼好誼屢
 訪城西故宅余時少隅侍周旋見公豐貌美髯容儀
 整儼有長者風味每心欽尚之今公孫東允以其大
 人命謁余銘公碣余不覺念舊愴涕也公諱著命字
 季衍系出 璿派始祖德陽君諱岐即 恭僖大王
 別子高祖龜川君諡忠肅公諱醉曾祖蓬萊君號滄
 洲諱炯胤祖縣監 贈承旨諱至考兵曹佐郎 贈
 參判諱箕相妣 贈貞夫人坡平尹氏縣令 贈承
 旨惟晉女參判號竹齋諱仁涵曾孫忠肅以節義著

昏朝滄洲以文行名當世竹齋公亦以文章擅詞苑
 公胚胎前光生而性度溫裕舉止自中規孝友本天
 得而恭儉清慎亦不違儒家法門雖在耆耄每當喪
 餘哀慕如袒括初不愆素食平日口不出鄙倍言身
 不設惰慢氣不妄交遊不喜芬華儕友有酒席雖或
 強赴必先起以避沈涵凡世之一切富貴榮利泊如
 也飲食起居人不堪其苦而亦恬不介意再典縣邑
 歸無一壟一民之增常揭范堯夫布衾銘以自警當
 事不計較利害裁以義待人無親疎貴賤一於誠己
 有惠不望人報人有善喜若己有癖於書晚年猶不

釋卷嘗言少時讀書得力最在論語教誨子孫必以修飭行檢爲持身之切務慎擇言語爲處世之要法其所謂得力者不但文字而已真有得於聖人言行之訓亦可見公自修之篤也御僮僕必推淵明此亦人子之意未嘗以所難堪者責之不以小過輒加笞箠至於六畜亦見其生不忍食其肉是以爲政必以仁恕爲主有寃則勿論強弱徐究而必伸之民有至親訟田者公以敦睦之義勤諭以還之其人泣下遂讓其田人擬公於蘇清河故事公年至上壽蒙恩三資人或意公有攝生之方公則無响噓呼吸之術

惟科宦無所累不如人之滄滄熱者貧富窮達不在心而節飲食慎起居以節宣自致之亦程子所謂忘生徇欲淡恥者也公五十三始以蔭除四山監役歷別提者再戊戌以禁府都事出監鎮岑縣辛丑遞乙巳復以漢城主簿轉司議是冬除振威縣令丁未遞直歸廣州宮村爲終老計壬戌陞拜僉知中樞府事壽爵也甲子以當宁耆社恩進爵同樞丁卯又以東朝回甲推恩陞嘉義庚午二月五日畢命松楸距公生壬寅八十九歲疾革手書遺戒喪葬祭奠皆令儉約與夫人面訣即使侍者扶而入蓋不

原海集 卷之四十九
欲絕於婦人之手也四月日葬于宮村辛坐之原實
參判府君墓左亦公遺命也夫人金海金氏僉正宇
梁之女府使 贈議政洪慶之孫性端恭貞惠事舅
姑盡孝奉君子無違己未過重牢九十受貞敬夫人
真誥生先公歿後公皆一年以日家言權厝于巽向
原與公墓隔一阜而近公不育取再從弟著遠子厚
濟爲嗣判書諱箕翊之孫厚濟娶郡守金時發女生
一女鄭雲煥妻再娶士人朴受益女生男東亮東允
東雨東雨有才志十七夭女宋光休妻東亮一子二
女東允一子皆幼嗚呼膏火世界公獨超然長往絕

意簪纓棲身澹泊韶顏白髮杖屨林泉怡神自適其
享用清福者二十餘年公可謂世間稀有之人歟銘

曰

觀人以何仕止爲大曩自辛壬忠逆互遞公雖末僚
考其起廢氣味惟同隨世隆污豈無承藉忠肅遺矩
臨頤告革神爽不昏考終以禮可見攸存生築歿窆
不離先兆我鐫其隧百世永詔

直長洪君

義人

墓碣銘

余方銘洪君正叔人有言之者曰是子也非餘干之
宗戚而又無其位與聞國事自蹈禍機其必可以銘

之耶余曰否否君臣大倫也無官爵高下有無惟盡分難矣當國家存亡之際大臣之死生以之者固難其無位而死於國者尤豈不難乎哉昔童子汪錡死於郎役孔子使魯人勿殤之義其死王事也童子猶然况正叔乃世祿之後異於草莽之民又其身枉末僚耶其死義也仁人之所可傷也宜乎鐫其墓而彰其忠也嗚呼辛壬之禍尚何言哉蓋景廟自在東宮有疾且無彞斯望國勢艱危人心危懼二三大臣與若而忠義之士爭效死國之心及今上陞儲位羣不逞惡不利於己陰結宦婢百般謀害遂大起

誣獄慘禍先及於向來忠義之類君與仲氏進士君俱不免焉辛丑冬以賊儒逆夢之啓君始謫明川壬寅三月逆虎誣上凶書四月君又自謫被逮屢值淫刑竟隕於狴狴實是月二十二日也後三年乙巳聖上即位之元年竝昭釋誣案特命復爵備舉恤典仲枉雪冤可謂無餘憾矣君姓洪氏諱義人正叔其字也世傳唐人乘舟渡海泊于南陽子孫仍居以為籍云歷幾代有諱殷悅為麗朝開國元勳始見譜書我朝有敬孫官同知成均號友菊齋係貞官待教至觀察使號石壁春卿都承旨號栗亭天民兩代

皆選湖堂以文行標望當世曾祖諱處亮吏曹判書
諡貞靖號北汀清白恬雅爲 四朝名臣祖諱九叙
府使 贈參判考諱彥度正郎妣淑人全州李氏正
郎緞之女君生於 崇禎甲申後癸亥三月十二日
文藝早成試泮庠輒居上游所作多膾炙人口戊子
中司馬兩試丁酉 除寢郎叙陞奉事直長不以官
卑而必思盡職君自幼儁偉異凡兒及長氣宇軒豁
卓犖有大志泛愛容衆而處事極周詳孝友其性也
志物之養愛敬備至在謫思慕不少已興言必涕泣
或感結夢寐如魚醢之微得親之所嗜不忍入口必

手緘以送雖顛沛蒼黃之際其就養之誠如此與仲
氏築一小堂同學其中甚有壘簾之樂敦睦親戚不
以踈遠微賤而忽慢焉周恤窮困誠意周至其將依
仰而賴以爲生者甚多至今達達有追頌德義嚶咽
不能已者居謫杜門謝客雖客廚艱絕辭受必加審
謹惟其戀親憂國一念如結發諸吟詠辭旨懇惻蓋
其忠孝惓惓赤心片片而然也始推訊一獄官以爲
某所坐不甚緊何至如此賊鏡厲聲曰此彼輩所謂
緩急可使者不可不先除之君識慮弘遠儕友咸倚
而爲重故凶黨亦素所憚酷禍之促以是也柎楊楚

毒之下神氣整暇不少顧畏數次置對之後不復一言威喝誘脅無所不至則乃嚼舌以明不言其堅確不變人不可及府卒至有流涕而語曰朴應教後未之見也嗚呼隸僮之賤尚爲之感動彼其之凶頑抑獨何心哉配漢陽趙氏玄谷緯韓之玄孫其父士人綱也貞慤端莊婦德咸備年四十一辛丑十二月十二日歿纜殯而禍作焉先窆積城湘水驛北麓坐亥原及君歿權厝傍麓丙午八月遷而同窆焉男長大原因錄用之 命今爲漢城主簿次理源志學二女適士人朴致茂進士李寅和大源生進士相龜以文

學有士友望相鳳早沒相麟女爲李壘妻朴婿女長爲尹守仁妻李幼理源一男相龜二男皆幼李壘一婿閔百賢嗚呼衰世之事或有不能循常變而合義者觀於朱子論趙忠定可知也向者當國大臣雖欲爲 宗社定大策若無相與周旋之人何以辦事功忠義之徒雖欲效死爲忠若不依藉大臣亦何以措其志也今不能同條共貫而必欲分而二之竊恐昧大體也當是時兇徒謀危之勢凜乎一髮雖賴 二聖慈友之恩如無小大士類拚死衛護則安能保三宗血脉耶是真黨綱之死使瞞賊徘徊漢鼎之傍

而終不得移之也後之尚論君子不可以不知銘曰
嗟辛與壬世禍罔極上而元良屢阽危迫下而二
賢并邁黜削君時委命榮也非惡我書其石昭示千
百

掌令崔公

益秀

墓碣銘

昔辛酉除夕余在伊湖墳菴孤露慨傷成六十吟二
十章時明府崔公俊卿亦年周一甲子懷一般相唱
酬後十八年而歲又將除俊卿歿已二暮撫流年而
興感懷逞事而悽愴因其胤子之請遂書其墓石曰
嗚呼公諱益秀俊卿其字系出全州上將軍諱純爵

首見譜書麗季有文貞公宰文學德望見幾勇退
本朝有參贊平度公有慶判敦寧襄度公士儀兩世
俱選清白幾世至諱性源是生諱磚無子取從氏
贈承旨諱碩子得一爲後是生諱潛卽公高曾祖考
也皆劬書飭行克繼家聲妣漢陽趙氏父昱公生於
肅廟壬戌二月十九日聰明穎悟五六歲已好讀書
與外從兄執義趙公聖復同學於王父七歲能屬句
有驚人語未成童盡讀經史文詞蔚然早成十七發
解弱冠以對策高選自此大小科解額或魁或兩場
無一蹶戊子中司馬試兩場以奇疾自停己亥冬始

擢增廣乙科即入堂后記事贍敏辛丑春 除昌樂
察訪公議稱屈有臺疏請調以槐院 上可之儕流
勸勿往公曰官無燥濕義當盡職且一日之養爲急
遂赴焉祛孔道積弊黜土豪之侵蝕驛田者繕館解
修馬政郵人頌之冬誣獄起趙中丞首被慘禍餘鏃
至及於公以爲趙公前後疏 啓公皆代手以公爲
趙公至親且有文望而誣之也里有癸卯僞科者公
惡其科名令同里人勿施接待例甲辰兇徒以此發
啓對吏凡三月時禍色危厲誅竄相繼公親老在堂
原辭不免婉曲乙巳夏化公獨抹撥者蓋由於此丁

未例陞典籍丁外艱戊申亂途作公以衰麻遂間關
赴勤亂已而還服闋 除監察禮曹佐郎旋移兵曹
因事遞辛亥入參 長陵緬禮連 除數職丁巳春
登重試七月出爲泰安郡守兼帶記注郡大歉公下
車特先揭榜諭以安集之意割清俸借公錢大備賑
資蠲漁稅寬徭役以紓民力歲荐饑民賴而全活六
載一心撫摩繡衣操心廉簡之褒方伯循良洗手之
目真可謂不墜先子之清操矣兼舉學政建書堂課
學生海鹵無文設郡三百年不聞儒生科至是始有
之人謂破天荒郡西方塘小墩迤入類泮水又置十

數楹仍舊亭憬夷之義名以思樂爲講武之堂勸射藝如課學焉修館宇倉廩改軍器旗幟不煩民力太僕以古馬場占奪民田則力爭而遂己之雇馬廳財盡幾廢則拮据劃助新舊迎送之費不責之民滿限將還公獨留衙病粹硯醫言多人乳邑村乳婦聞之爭來進乳郡之民士爲文虔禱于山神或酌水以禱日月疾即瘳若非仁心之入人者淡能若是耶余往往至泰安泰人爲余尚說公爲政之仁公歸鄉新定文會堂規約以課後進爲閒中常業甲子被選文臣庭試蒙 賜馬典秋始除掌令旋遞後又以掌令

上疏言敦勉儒賢之道以爲尊寵其人不如聽用其言是時朴公弼周承 召至京留疏徑還公疏以此言也又疏演說朴公疏中毋自欺不自用二條備陳聖學之要君德之失告戒切至又言臺臣之以言獲罪者宜亟宥釋言事之疏不可無答還給疏八四日始下護私之 教公遂引 啓即遞間有海幕掌試之 命宗簿正之 除後以掌令入對庭鞫 啓請寢 筵臣之特遞而有 處分模糊之語 上特降嚴批模糊二字非人臣所敢言先罷公又令削黜丙子春用 邦慶推優老典陞通政卽拜僉樞秋丁繼

母李氏憂公病已示憊至翌年強行練變積疾久危劇精神不錯進藥餌則却之曰命也惟以喪中死者多變禮命子弟一如禮十月九日竟不勝喪享年七十六葬于公州北蓼塘向辛之原閔夫人先葬穿右窀合墳焉公天資溫雅志操恬靜平居無惰容於物無玩好凡世情淡如也惟聞人小善至誠愛好孝友篤至七歲失恃爲祖母姜恭人鞠育公稍長一以事母者事之及喪哀毀亦如喪慈母從大人後常侍几筵祭奠受弔一日不廢三年不赴舉每慟先妣喪出羸瘦送終不能校心別具衣衾棺木改斂而擇地移

葬又以幼穉不能服衰爲終身痛喪餘回甲號擗一如二祥以素帶終其年不與宴樂事李孺人平日奉承一於愛敬定省告面之禮年踰七十猶不廢在郡孺人親忌亦必助祭無間所生外氏皆人所不能也及喪公病甚拜跪須人而必躬將饋奠念兩弟窮困皆具屋子以處之出已田以資之自少雖不以經學自居平日工夫專主經傳精通慣熟及授後學則如誦己言存心制事必裁之以義理爲文去浮華險怪之習又不務工聲病而惟展拓筆路從實際上平說道理知與不知皆稱選文如科場宿儒亦莫不以公

屏溪集卷之四十九
文爲程式之菽粟是以國朝科選只有大小科重
庭試而公無不中亦近世罕有也常戒子弟曰科業
雖不可廢從事學問可無累志之患學問之道必以
立志爲先凡人不修其職而游衣游食者天地間一
賊士之職惟讀書以明其志實踐以修其身也世之
好自標致無其實者皆非修其職也爾輩識之配閔
氏系出驪興其考學生行重贊成齊仁之後德性粹
美早知禮義大防在室居親喪啜粥疏食終三年及
歸公孝於舅姑如事父母公間邁疾尋醫在京邸聞
疾篤夫人冬寒沐浴露禱不撥及還夜不解衣帶晝

不離炊爨秤水茶湯無不躬執公家甚貧百艱千窘
而夫人淡淡方泳勤謹省約喪祭事育無闕一以恬
靜處之公常許以夫婦間知己公登科第夫人不甚
喜仕路常跽而亦不甚憾在官而內入甚薄不以爲
嫌勤於紡績備公時服如在家時公廉簡之治夫人
之助爲多生先公二年歿於壬申十二月十四日壽
七十三一男海觀進士女適持平尹在謙士人李思
贊進士三男長鍾淑天資近道天坳次鍾洛次鍾漢
幼一女宋載仁妻鍾淑一子宋婿一子皆幼尹持平
所後子景祖文科正字早歿六女李元彬任蓋榮李

屏溪集卷之四十九
允健三女未行嗚呼公清介廉約守分用拙人或謂
於事踈惟其讀古書通事理臨事知其要做事必以
誠爲治則以愛民爲要誠心仁愛實惠及於民民愈
久不怠居臺則以格君爲要誠心憂愛指陳君德得
失靡不明詳然而暫試小郡未究所蘊一疏僂斥未
展素志俱可惜也若甲辰一事不知朱子處傳秘閣
之義何以觀公之過而知公心也李公箕鎮之當銓
也問當世臺通於寒泉李公則以公應之太學士趙
公觀彬少小善公終始不替至以狀公德行自擬也
二公皆壬寅禍家子弟而知公心而恕公者如此豈

亦得於朱子觀人之義者歟此可以銘公銘曰
君子論人貴在觀心公狀士克公心是謔公實自責
士流無砥公於績文如玉之琢公於莅官若冰之潔
豈有是哉其操有存霜菊滿畦晚香爲扁先生手題
寧亦無意後之知公庶幾在此我銘載石用示千祀

縣監 贈判書金公季珍墓碣銘

仕宦而能知止人鮮焉知止而又能知優閒之樂者
爲尤鮮焉吾見多矣惟金公諱季珍仕而能自優閒
其不待仕止心不役於仕也歟公月城人字仲瑞新
羅王之後麗朝有太師仁瑄始見譜書八世至都觀

察使自粹有至行號桑村逮我 太宗以刑曹判書
召自決以明不事二君之意牧使諱塤 贈承旨諱
好尹察訪 贈參判諱積監司諱弘郁號鶴洲寔公
高曾祖考也鶴洲公文學經綸爲士類所推重在海
營應旨疏言姜嬪獄冤忤 旨邁禍尤菴同春兩文
正 筵白直之 孝廟命卽復官後 肅廟仲復姜
嬪蓋因其一疏而亦特 贈公吏曹判書諡文貞公
妣貞夫人吳氏參議靖女參判號晚翠億齡其祖也
以 仁廟丙戌三月廿七日生公九歲遭文貞禍哭
泣哀慕若成人焉隨伯氏贊成公奉母夫人歸湖庄

孝養數十年甘旨藥餌之供竭誠敬無所闕起居節
宣之際親扶將不少懈及喪慟致踰常自以穉季居
幃多不如禮今吾可以自盡也執哀幾滅性喪餘必
備物豐潔將事於宗家終身不廢蓋遵吳夫人遺命
也平日事伯氏如嚴父與諸姊盡愛友以至宗族無
踈近一以誠曲待之公產業頗裕親戚之貧者必愍
恤之其尤無依而衣食於家者亦多雖素不知人有
丐則輒與之日累至而無垂橐而去者辛巳始 除
殿郎旋移翊衛司洗馬平陞至別提乙酉以掌隸院
司評出監知禮縣以方伯姻嫌翌年遞復由該司簿

除黃澗縣監用財極簡嚴如蕘醢之屬取用於家不以害公知黃之民久愈稱說居不久告病遞歸卧鄉廬以爲終世閒放之計公爲邑勤以政成廉以威生未嘗以刑杖施人不但性本仁恕蓋有隱痛而然也以是公才藝邁倫意不欲進取早拋鉛槧趨勒有法亦不自有俱不肆力人無知者公娶居昌慎氏僉知峴女左議政守勤六世孫婦德咸備事姑克孝敬待妯娌御婢僕務盡和惠教子女必以義方治家事亦必誠勤常曰怠則業益荒慢則家漸乖此不可不知云公沒於己丑三月二十日壽六十四墓在瑞山芝

谷栗室里負酉之原夫人先公四年生沒後公七年葬同窆己丑後五十一年己卯我 聖上冊今 中宮殿下正位坤極寔公會孫漢耆之女桑村鶴洲俱以名節直道捐身殉國正氣所萃潛光毓祥公又長厚淳德鍾美在後載誕 聖女母儀王家積善餘慶焉可誣也漢耆遂拜領敦寧府事鰲興府院君推恩公 贈資憲大夫吏曹判書兼帶如例慎氏從贈貞夫人公一男斗光一女適府使李箕恆運慶選慶縣監李夏瑞妻斗光出選慶己卯超資 除戶曹參議著迪著選著進伯仲皆郡守正字宋翼長縣監

金光遂妻李媾出運慶生三男長漢禧生員次漢祿以學行見推士友漢祚天女生員鄭存慎妻選慶生四男長漢耆寵貴若驚謙謙退遜不改儒素規模次漢耆漢老漢三女申景若洪相休李妻李夏

瑞生四女承旨鄭存謙金載敬魚錫文妻玄孫男女摠若干人嗚呼公長身美鬚髯風儀順偉性厭趨囂喜處黻仲長統所謂良田廣宅背山臨流溝池環匝竹木周布場圃築前果園樹後者即公所居而其又所謂良朋萃止則陳酒肴以娛之嘉時吉日則烹羔豚以奉之躡躅畦園遊戲平林濯清水追涼風者亦

公所自爲也若其逍遙一世之上永保性命之期者亦惟公之平生所自冀也嘗書此論揭之座右曰人生於世如斯足矣何嘗營營於爵祿爲也此可以見公之志之所存也夫余以公故人子穉髫時屢侍公隅坐後又就拜公於橋西時公方仕而偃仰邱原隨分任真恥世之滄滄者類豈非其爵祿不入心者耶今參議以公狀授余以謁銘余追念撫頂之恩不敢以老病詞拙辭謹撮其狀而序次如右銘曰

嗟公之世公自踈而嗟公之具公不居而低徊陰塗猶自捲而我稼我釣愛聞遺而裕以貽昆煥莘孳而

不顯其光邦之懿而公之有知敢只榮而公當謙約
想益兢而先思以勗惟後承而芝谷之山鬱松翠而
封土崇崇永千禩而

僉知權公

養性

墓碣銘

惟我文純公寒水齋權先生有嫡孫曰養性字伯涵
其考府使諱煜先生承嫡傳之統爲斯文宗師府使
公服襲庭訓學博行純是真難爲子與孫而公天姿
溫雅仁恕自髫齡時言爲容止能自謹飭見者已知
爲法門子弟及長以病謝絕時文業築書室於園中
僻寂處晨昏之暇穆然靜坐一切俗事無相干涉惟

以調養看書爲意辛丑蔭補繕工監監役旋移童蒙
教官以先生疾篤辭遞秋先生易簣服承重斬乙巳
用監董勞陞主簿俄遷京兆出監麟蹄縣國法蔭仕
必試講而後授邑宰 上命公除講蓋以公先生胃
孫 持寵之也至辭陞 上引見備問先生典刑及
所居江山之勝仍 宣醞賜鹿皮且 諭以清白奉
職無忝先烈皆別 恩也公之家法本清慎而及承
聖教益自感勵悉心撫摩政成民和方伯褒 聞丁
未陞拜金堤郡守時羣壬人得志義理晦塞公不樂
仕宦不赴郡歸黃江鱗廬後以漢城庶尹宰白川逾

年罷歸連 除數官皆告病免甲子 上入耆社命
推恩公遂陞拜僉知中樞府事丙寅七月九日考終
于正寢壽七十二葬忠州北東谷負癸之原即先生
墓右崗也公之世不須譜而又載之先生大碑可詳
也妣慶州金氏副提學松崖堂慶餘之孫縣監 贈
參判震粹之女公始娶參判李思永女不育再娶縣
監趙麟祥女有四女適南赫寬李長源教官金詰行
修撰李敬玉三娶士人李世觀女生子濟應今爲同
福縣監二男中執中協南赫寬子紀澤金詰行子履
常李敬玉子觀城恆城餘皆幼公端默簡淡平居恂

恂若無能至言是非事當否裁以義理辨釋甚晰於
財色最嚴以爲不透過此兩關無以爲士嘗曰吾家
清貧本以官糶爲契活若自我潤屋是墜家聲也二
邑之歸無一壘之增奉先盡誠祭則必前期齋沐備
物必親蒞雖寒暑甚時不少懈每舉直字自飭曰此
朱子訓門人語而我王考所受於宋先生者上可以
養浩氣配天下亦不至爲倖免之人吾家子孫尤
宜執而勿失也疾革招子姪戒以五倫之道申申不
已公之得於詩禮之教而所自守者此可見矣嗚呼
余嘗侍先生於寒水齋先生使公不離左右主筆硯

役已知公爲先生鄭重也樛摧之後每擬從公共修先生遺矩公又棄我逝矣未嘗不懷往來悒悒今余棲人巖畔數月屢至寒齋下拜先生真頓退見公舊居茅堂閭然掩扇益不勝其感慨遂取震應之狀略書數行俾揭之墓阡銘曰

公之從子我師之思其言有物汗不阿私我撮其狀參以舊聞惟清與直體先貽昆劓之于石表三尺墳

贈持平李公墓碣銘

嗚呼天高地下日月照臨亙萬古而無虧斯其爲重峯趙先生之墓者此華陽夫子之語也公之義卽趙

先生之義公之忠卽趙先生之忠也今公之墓亦不可以是書之耶昔在

漢師 車駕西狩八路塗炭公時在嘉林鄉舍北望

長號不勝憤痛居溪室不見客勿使妻兒近前默坐揣念勃勃若奮身投袂時趙先生義檄至公一讀汪然涕下曰此吾死所吾可往矣五月六日卽辦行拜辭先廟無一言刺刺向家室語少子在門啼號絕願戀意着跗注橫長劍上馬揮鞭快意勇往暨暨有貞丈人氣象鄉里咸驚異之赴趙先生於公州先生方募義旅見公至握手相歡聞公籌畫嘖嘖稱焉公請

原溪集卷之四十一
亟建義旗立軍號義募者千有六百時賊據清州防禦使李沃兵潰公謂先生清州三南之衝失之勤王之師路絕莫如先意於此先生從之即往清州與僧將靈圭薄西門鏖戰先生親冒矢石士皆殊死公勇冠一軍所格殺甚衆先生拊背曰壯哉討紅巾餘勇復見君矣公遠祖芳寶麗末擊破紅巾賊故云賊大翻夜空城而逃先生與公遂決意勤王整軍北上巡察使尹先覺請先生共討錦山賊公亦言賊蹂我土且盡獨餘湖西南陷此無國矣亟向錦茂間以遏賊勢計之得也先生乃還軍公州始先生起義先

覺忌先生之首事也私以計沮募義者先生貽書責其擁兵自衛無意勤王抑忠臣義士之氣先覺銜之至是隰州縣繫義旅父母妻孥將士稍稍散去義士之願從者只七百人先生與公等聯靈圭兵直趨錦山曾與湖南巡察權公慄約以八月十八日並進夾攻權巡察移書改期而先生義旅是日已抵錦郡北十里地賊訶知我兵單無助乘未陣分其衆迭肆肉薄先生大呼公等曰今日只有一死死生進退無媿義字公等齊聲曰諾力戰良久賊三北幾潰我兵已矢盡賊悉銳突入帳中公等張空拳擊之猶不離

屏溪集卷之四十九
次相與環先生枕藉而死嗚呼偉哉以半千未鍊之士抗數萬長驅之勢眾寡不敵其陷敗固也然無一人倖免同作一瘞號以義塚則先生之信義能固結人心可知而又非公等聲氣相感忠義素講者顧何以辨此真可謂其所摧敗亦足暴於天下者也况是役也賊斃過當三日運屍哭聲震野遂與茂朱諸屯賊皆遁去忠全兩省賴以全安以基再造之業其功績豈可誣哉公子純誠時年十六不能往尋遺骸以衣冠葬於林川新里面海村壬坐之原後本道多士上疏言公精忠大節不可泯沒今 上丙辰庚申連

下 贈爵旌閩之典身後哀榮亦不爲不備矣公之誠忠義烈實有淵源公會祖諱世應錄靖國勳官平安道觀察使柳子光屠戮搢紳以司諫發 啓論斥竟竄之祖諱霖官大司諫 明廟初言當國家危疑母后不可臨朝遂杖配賜死蓋公世類如此公自幼卓犖不羈稍長屈首讀書有志聖賢學閉戶潛居揆索義理不肯爲章句小儒無意就公車制行不苟志尚甚高所居不蔽風雨妻子不免飢寒恬然不以爲念或時自激昂觀古今人立懂處必撫卷流涕其終與趙先生樹萬古綱常者亦莫非資性然也歟公姓

屏溪集卷之四十九
李氏諱旺字絳之咸安人芳實寔始見譜書麗季名
臣幾代至觀察公而皆圭組蟬聯考諱昌亨以家禍
隱居不仕娶豐壤趙氏進士砥之女公以嘉靖戊
午三月初八日生配河東吳氏判官世仁女庚申生
後公十年歿葬同窳純誠男蔓茂蘊女適金英望俞
業李秘麒徵俞命寅姜震望妻蔓出遠徵茂出弘徵
明徵鳳徵龍徵趙顯耘鄭相周妻側室二子蘊出玄
孫以下多不能錄弘徵曾孫恆積從余遊一日以其
諸父兄意來示校理俞公命胤所爲狀謁余銘公念
公子姓兄弟甚鮮家乘文字又盡於兵燹平日事行

無所考據而惟校理公生公之鄉去古未遠聞於其
先子市南先生者必詳無疑茲謹撫實而書之如右
銘曰

莫貴忠烈亦道中事所以尤翁論先生義以其大節
歸重於學公自少小爲學之篤熊魚取舍辨能真知
當爲僂爲若食於飢豈如一時意氣殺身是與先生
同一致云錦北之哀雷行赫赫矢復在嘉過者必式

黃君時憲墓碣銘

關西自句麗以武力爲國後于餘年仁賢邈矣荒陋
而已及我朝聖作文教西被土風丕闡邇來峨冠

博帶讀書修行之士往往自西而來今不可一視以
弓馬之俗矣黃君時憲赴赴中傑然者也姿聰穎質
敦直不待師承自知俗習之外有爲己業篤孝友謹
言行弱冠遭外艱哀毀逾禮奉養慈氏盡誠愛惟志
是循衣服飲食必在扁其堂曰愛日無大事故不離
親側或作嬰兒戲以娛親每春煥秋涼必置酒邀諸
親戚獻慈氏壽甲寅居憂哭泣哀動傍人葬祭一遵
文公家禮後值喪餘終日涕泣無異袒括時終身不
衰蓋性孝然也旣祥有達官過密邇地相邀之君以
禫服辭其謹於執喪如此季父年少於己克敬慎出

入必告面子弟有過教戒無大聲色居家主恩愛和
氣藹然而門內斬斬妻孥事之如嚴君焉宗族鄉黨
之貧者生則衣食喪則斂棺賴君而爲者多頑悍者
歸順偷竊者感媿此其觀感所及也君字士章其先
尚州人世居沮江西有世昌以孝友聞是生天性天
性生義宗俱清拙自守義宗生俊建軍資監判官卽
君考也嘗歲饑傾家廩賑鄉里百餘戶人謂黃氏之
後必昌妣林川朴氏其考世華君配慶州李氏僉知
一元之女二男萬甲武科縣監龍甲殿郎一女適崔
錫紀側室子千甲大有大秀大佑女金光河洪九叙

屏溪集卷之四十九
金敬身縣監出進士大厚殿郎出千甲男大普內外
曾玄童幼君常好讀易每曰人不可以不學學必以
讀聖賢書爲先讀書無踐行之實與不讀書同行則
必以孝悌爲本君未嘗以學自居而亦可謂知爲學
之先後本末也若使早遊於先正之門周旋師友之
間其成就必有可言也嘗留意世務間隨東槎歷略
遼薊山川自關防廢置之要錢穀甲兵之細莫不區
劃當否而或時夜泐寂朗誦武侯出師表獨自擊節
感慨豈無意在道臣以識解既博幹局有餘薦于
朝除魚游澗僉使蓋亦不知君也竟不就君歿於壬

戊九月十日年五十八葬于府西降福山面巽之原
從先兆也李孺人與君生同年貞淑嘉柔事舅姑以
誠承夫子以敬君自謂夫婦間知己大厚曾從余遊
今者携持平李君仁采所爲狀以其大人書謁余銘
其書卽李孺人之意也病裏諄諄詔教者只欲得余
一言爲不朽君也已非俗婦女所可爲而又請毋溢
辭以累吾夫子豈非所謂女中士耶君與孺人相爲
知己則此亦可以知君矣夫遂感孺人之言撮其狀
而書之如此銘曰

有好學志不以學名有篤孝行不以孝稱君實竭力

吾必謂學欲知君者視此泐石

府使尹公

是勇

墓碣銘

嗚呼潭陽府使尹公諱是勇字士謹與余同望坡平以太師諱莘達爲初祖歷十三代至三重大匡鈴平君諱陟始派別源遠已所謂一人之身分而爲路人然自我推之同一氣也豈真以路人視哉公玄孫萬英東英濟英等謁余銘公碣義何敢辭謹按狀公以嘉靖乙丑生自幼力學弱冠負笈於具人谷思孟之門文藝日就趨勤尤工所與遊皆莫能京廿八遭倭寇十年走竄東峽亂己中辛丑司馬旋除掌苑別

檢遷禁府都事坐微旨遞癸卯闡明經科由注書陞典籍以禮曹佐郎連補康津龍仁二縣時光海悖亂戕殺同氣幽廢 母后公悲憤痛慨棄官歸鄉廬杜門淡居間判江界寧邊又宰白川先是有當路者守制於鄰併人皆媚趨公不一過已見其忤在寧也邑有妓爲一權倖所愛不肯踵前人之馱送因罪而杖之屢被其噍前後再速抨彈蓋有憑然也檄島管餉使辟公爲從事五年而辭遞旋拜平安都事陞通政階爲龍川府使公不樂久於西病辭方伯已 啓遞之繡衣宋公象仁道遇公眷集之先還者裝橐蕭然

屏溪集卷之四十九
搜其行見其與子書但無恙二字即以書告方伯曰
龍川真廉吏亟止其 啓及還 朝奏稱公冰蘖操
後與公結爲心朋轉三郡宰卒官潭陽丁丑五月二
十八日卒于家壽七十三公孝父母友兄弟其性也
及孤露見先蹟輒嗚咽流涕遇夫日必親執籩豆析
產約於弟擇肥厚盡歸之伯兄孤子以奉先祀其餘
送于姊公婦翁金公宰南縣公處甥館雖聲妓紛華
之時每端坐讀書未嘗一忤目其所操可知平生喜
踈曠不欲與世俯仰又翫辭不苟合見人過不憚面
折仕路之躋蹬以此立朝三十年典十餘郡終無一

壘可歸一椽可庇寄依於弟別坐是纘卒之日用親
朋賻襚得斂葬焉宋公廉吏之稱誠得其實也鈴平
之後有版圖判書承禮府尹普老參判岑參判即公
五代祖也曾祖諱三孫直長祖諱聞生員考諱承源
妣延日鄭氏圃隱先生五代孫鷓孫之女公初配光
山金氏其父牧使立輝沙溪先生叔父也再娶驪興
閔氏參判濟子參奉友顏之女公葬在大興東注洞
負艮之原二夫人俱先公歿皆葬于楊州鳴牛里艮
向之原同域異墳蓋先兆也公有一男慶望 贈吏
曹參議元妣出也慶望三男三女男爾善 贈參判

屏溪集卷之四十九
爾咸 贈參議爾逸出後族叔女適慎澤柳百明柳
壽一鳴遠鳴最僉知 贈判書鳴九長房出也鳴履
僉知鳴周 贈參判鳴益四女二房出友吉友鐸友
喜三房出玄孫以下七十餘人多不盡錄惟鳴最子
大英文參議屢陞至知中樞同樞萬英東英濟英鳴
周子是謁銘者也銘曰
伊公之才之志何郡級之是終試觀公之時其可以
知爲公也夫

屏溪先生集卷之四十九

屏溪先生集卷之五十目錄

墓碣

知事俞公

廣基

墓碣銘

持平泉西尹公

焜

墓碣銘

贈持平姜公

眩

墓碣銘

直長鄭公

泰河

墓碣銘

縣監正菴李公

顯益

墓碣銘

谷山府使

贈兵曹參判安君

相漢

墓碣銘

贈參判金公

泰魯

墓碣銘

僉正李公

賈

墓碣銘

屏溪集 卷之五十一
通德郎朴公 暉吉 墓碣銘

贈左贊成金公 斗光 墓碣銘

牧使權侯 字亨 墓碣銘

敦寧都正 贈吏曹參判朴公 起祖 墓碣銘

北兵使李公 暉 墓碣銘

屏溪先生集卷之五十一

墓碣

知事俞公 廣基 墓碣銘

士之處世重仕止聖人時可之義尚矣雖末宦微爵
若昧義而趨利他不足觀知事俞公仁伯其仕其止
審義理不自苟焉可以占世道之污隆其亦真士類
也歟公諱廣基仁伯其字俞氏上世有仕新羅官阿
殮名不傳又幾代當麗初諱義臣自以羅氏世臣不
屈異姓麗祖貶屬杞溪縣吏子孫仍籍焉至我朝
起昌以言忤燕山島謫中廟特拜兵曹參議召

之終不仕是生景安公汝霖景安生肅敏公絳兩世
俱位至八座監司 贈贊成諱省曾監司 贈贊成
諡忠簡公諱槐監役 贈判書諱命賚寔公會祖祖
彌也忠簡疏言夷 皇陵之隳虜不可和名動搢紳
判書公受業於宋文正先生以文學有士友望公妣
潘南朴氏承旨世城女公以 崇禎後甲寅二月日
生幼自能劬書詩文早成藝業輒屈曹偶祖妣宋夫
人通經史識義理判書公早失怙實奉教於慈氏先
生命號其所居堂慈教者以此也公兒時不違侍右
受簡諒之學亦多先生爲夫人再從叔父嘗臨訪夫

人時公十歲隅坐承誨甚有覲德欽仰之意先生亦
嘉愛之後作公字說勉之壬辰丁判書公憂喪禮一
遵遺意必誠必慎哀慕三年如一日數年而宋夫人
歿殯葬之節親自經紀無一遺憾不但其教育之恩
靡間慈母寶體判書公孝思而兢兢然也丁酉遭朴
夫人喪執喪盡制如前建墓齋置祭田具祭器墓隧
碑版謁文於諸先生必闡揚先德一致誠意不以力
不逮不爲也公屢舉不遇戊子始中司馬己亥 除
顯陵參奉例陞奉事直長移拜參軍辛壬禍作公曰
此非科宦時遂絕公車及至盟賀俱不參凶黨仇嫉

屏溪集卷之五十一
公劾罷乙巳夏化復拜直長陞主簿旋以戶曹佐郎
出爲昌平縣令時丁未秋也世道又變忠賢斥削凶
孽當朝公遂棄不赴戊申賊起中外震盪公新拜刑
曹佐郎旋入金吾時 上日鞫逆豎公方病在牀以
輿疾之義強起參鞫俄 除禮山縣監縣與賊屯境
相近官吏有管屬於賊將而前倅連以逆被逮縣事
艱隳公單騎馳赴邑里蕩然如兵燹餘吏隸駭散官
庭盡空公招諭吏民慰撫還集始知公以命吏來各
自安堵時賊猶未平人心訥訥一日夜忽舉火山頭
邑村大驚擾公終不動以鎮之又曉叱相傳有鬼魅

乘夜作怪愚氓狂惑擊鼓箏每夜喧聒公以爲虛謊
也發吏嚴禁竟寧息焉公爲政以程子存心愛物爲
主又當邑中散亂一意安養蘇殘民賴之繡衣按廉
還以政尚廉謹嚴束吏屬勤于惠絕干囑等語褒奏
之五載罷歸庚申復仕轉數官至司饗院僉正甲子
上入耆社公以七十職四品推恩陞通政後以大耄
相臣 筵白又有邦慶再三覃 恩由嘉善嘉義至
資憲秩正二品歷僉知都正同知同敦寧卒官知中
樞府事間蒙米肉表裏之 賜丙子 上之 賜忠
簡諡也公感歎曰今 聖上特 賜恩諡者吾祖斥

屏溪集卷之五十一
和在是年故耳延謚之禮不可踰歲不顧私力竭盡
心力遂亟舉盛儀丁丑五月公示懋七月二十八日
卒壽八十四訃聞 賜賻祭如儀貞夫人咸平李氏
考諱華相恥庵公之濂子出爲龍溪處士榮元孫之
鎮後恥庵公以學行名當世夫人生長膝下受內則
女誡等書有女士稱及歸公舅姑甚宜之宋夫人亦
稱賢婦與公生同年沒於庚寅年三十七公鰥居四
十八年無女御之畜不但公自守恬靜夫人令德有
不可諉者亦可知也公臨終有屈指計日者然至臯
復與夫人亾同月日誠前定之奇緣也夫人葬在楊

州車踰東先塋與坐之原至是同窆焉彥鐸敦寧都
正彥鎰直長彥銓彥鏞四子皆中司馬長房男大司
諫漢蕭縣令漢葛漢蔣女承旨洪宗海妻二房男孝
子漢邴漢耿女金礪行妻三房不育取漢葛爲後四
房男漢嚴漢廉漢寧女進士黃栒李弼模金集淳妻
曾玄不能盡錄公品質長厚志趣雅潔孝友其性也
每居憂幾毀滅哭喪餘若袒括大枕同居既洽且湛
怡愉之意藹然可掬推而慈恤於門內者先勤孤寡
自湖縣歸杜門靜居日玩書史晚來秉燭之業多在
禮書疑文變節隨問輒辨且謂斯文是非君子小人

屏溪集卷之五十一
之辨實格致之一端自其源頭劈破甚瞞士友講說
類多曉釋此皆家庭承聞之餘也先代事蹟恐愈久
愈昧自始祖後碑誌及稗錄瑣記可考實者手裏成
秩名杞溪家乘用示後昆亦尊祖重本之意也嗚呼
念昔公之宰烏山訪余於屏溪携示公叔弟叔範狀
曰子非吾弟之心朋耶幸子之書其行將埋之壙也
余相對愴涕不忍辭也今都正又托余銘公墓余既
不辭叔範誌於公銘復何辭也銘曰

義理明晦士以仕止繫公於是惟是之視豈適蔭塗
蓋是罕觀茲黨所嫉君子攸取莫非文正遺韻是服
淵源家學餘襲馥馥孝敬清慎非無來眎惟此持揭
亦衰世意隧石皇皇式千百禩

持平泉西尹公焜墓碣銘

昔余侍函丈間先生曰君見尹晦甫否湖右賢士蔚
興德性謹厚無如晦甫後庚寅春余有事伽仰迤向
溫泉訪公居時公携書入山逐溪向上至所謂巍巖
書齋即公與李公柬公舉羣居講學之所見其齋額
觀善先生大筆也公幅巾衫子與數四士友出迎齋
外揖讓而入觀其儀貌已知儼然長者人也聽其講
說即學問高明之士也察其所存真有德君子也知

先生之前日詔余者誠有以矣公諱焜晦甫其字家在盤泉之西號泉西籍坡平始祖麗太師諱莘達太師至昭靖公諱坤十六代與余同祖皆麗鮮大官二代有領議政府院君弼商又四世至觀察使希吉號秋崖寔公五代祖高祖持平諱根光海時不附兇論出補關西以卒癸亥特命贈職曾祖諱獻徵始卜居溫陽之巍巖隱德以沒世祖諱瑛號素安齋清修雅飭恬淡無累尤菴宋先生書座上春風四大字以貽之蓋許其氣象也考諱東鳴早從先生學天沒妣清州韓氏其考成進士尚吉之孫性行溫順梱範甚

備公生於肅廟丙辰三月日貌豐而氣秀五歲受潘史碁而盡七冊素安公奇喜期其大成嘗讀書庭有狗瓮覆其首驚寔奔旋人爭駭笑公則專心所讀若無覩也一日長老遊玩川上招與同往對以方讀書讀訖追進此皆公六七歲事也其德器之早成爲學之篤實自兒時已然十歲汎濫經史受易於家庭啓蒙析合補空之說爰畫生變之義自能究解十三喪先府君哭擗之哀至動傍人讀喪祭禮守制無異成人鄰里稱善居喪丙子遭內艱壬午承重祖母喪戚易允備倣司馬公居家儀作一文字與同堂諸昆

弟講行于家皆敬親長敦宗族修身爲學之事也每早起問寢王父展拜家廟家甚貧竭誠奉養滫瀡無乏教導諸弟友愛篤至婚嫁皆用古禮丁亥以師生禮往拜先生質大學疑義而歸先生極稱之淡幸斯文有人云後因先生命留門下參校劄疑李公自少鄰居至老大道義契淡常交勉曰吾二人性質之剛柔不同當戒弦韋可相濟也時又賢士友如申公慤叔敬韓公元震德昭崔公徵厚誠仲玄公尚璧彥明韓公弘祚永叔皆請業江門相與從遊行津繩墨講明義理湖學彬彬之說至徹 上聞己丑秋公與諸

士友入華陽隨先生後參萬東 皇祀先生爲行鄉飲酒禮以地主爲主人文巖鄭公爲賓公爲介士林傳爲盛事癸巳御史以經明行修薦名于朝甲午中司馬丁酉 肅廟幸溫泉命道臣薦學行士道臣稟議先生舉五人以公爲首己亥 除 明陵參奉未幾旋登別試乙科先進士類以公問學精淡將以兩筵處公尤爲一邊人嫉惡分館國子領相夢窩金公白于 上罪槐院用事者更令別爲調用選部旋擬侍講院說書蓋參下清選庚子 肅廟賓天八郡庭成服九月 除濟原察訪爲政仁恕清簡惟時翛然

屏溪集卷之五十一
靜坐潛心玩書御史以賄賑 啓褒而亦言清謹之
操儒雅之治翌年秋承先生訃加麻卽奔哭而歸冬
以賊鏡兇疏世道一變公曰雖微官此非仕宦時也
促裝僂歸蟄影息交尋理舊學壬寅素安公歿居憾
一如前喪今 上元年乙巳新化改紀公首被 恩
命除司憲府持平公以爲 聖上新服景命此正亨
屯回泰之機輔 君德辨 聖誣討國賊爲今日第
一義而師誣之辨亦係吾出處大節不可不先爲陳
一疏以爲致雲誣啓其窮兇絕悖真一變書終古茲
兇所未有也今 聖上雖快賜昭洗致雲之臺啓請

竄尚此靳 允致雲之罪不特毒正而止實誣告之
賊致雲不服當律則臣師之誣終歸不白然而 殿
下追加尊禮於臣師又曲加容護於致雲認若并存
而無傷也天下寧有如許道理後與諸臺請對極陳
討逆之啓公又言 上批中嫌字之非曰聖人之心
大公至正無私故無嫌今討逆之論端出於公正之
義 殿下之身宗社所係 殿下安得以私之然而
每下嫌字竊恐 殿下格致之工未到而公私之分
不克盡察一段嫌避之意猶存於中而然也又曰
殿下以爲予意有在 聖意所在可得聞乎 上曰

厚溪集卷之五十一
日後可知公進曰君臣貴相知心日後可知之事今日知之可乎 上終不答後以連啓金東弼事 上下嚴教公引避曰當日春坊之罪實國人之所共憤王法之所不容臺啓之不得不論東弼也 上又下嚴批斥之右相李觀命極言 批旨之過 上曰君君臣臣之義決不若此輕人主必欲角勝可乎右相曰臺臣豈敢角勝伏節死義之士當求之犯顏諫爭之中如此之人正宜崇獎不可摧折後 上答諸承旨覆迨之啓曰臺言過中不以爲非又曰惻怛之王言不如淡刻之臺論乎公引避言易曰虛受人蓋虛

其中而後能受人之言今 殿下先橫着一端私意已在於中人言何自而入然則 殿下所謂過中者安知非得中 殿下所謂淡刻者安知非平允也今一任 聖意不恤公議臣恐 殿下有自聖之病也與同僚伏閣請討諸迨公以光佐惡迨不道當直請按律不可循例請竄僚議不一違牌遞秋選知製教又拜憲職公本山野人不樂仕宦已見時事無可爲而主知未結言不見用實有退歸自靖之計第欲陳一疏罄盡所懷以附格君之義草土餘疾至是陡劇起草纔半竟以九月十九日臯復于旅邸搢紳士友

奔走弔哭莫不嗟惜曰世道斯文不幸也 上聞喪
例賻外 命沿路護喪又 命道臣給葬需十月庚
申權厝于郡南弓坪丙午十月乙酉遷窆清州二西
鶴峴庚坐之麓恭人趙氏籍漢陽縣監晟漢之女祖
克善號冶谷以學行官進善恭人性至孝行著閨門
未及見姑聞喪而來哭泣哀慼感動鄰里撫育夫之
弟妹哀傷惻怛出於至誠事祖舅姑克盡誠敬鄉人
之稱尹氏孝友者必稱恭人之賢後公十五年己未
十一月日沒同葬公墓而異壙生五男在觀在復在
謙文科掌令在恆在泰出後於人景達景述李達輔

李度一李錫九妻長房出進士景勳正字景祖景安
出後堂叔景肅柳復心李樂慶妻仲房出李元彬任
蓋英李允健李道燦趙顯重李建胃妻三房出無子
取景祖爲嗣景文林惠復妻一女幼四房出景溫李
英實李東哲妻李房出在泰景勳景祖俱志先學從
余游景祖以承文正字不幸早幼曾孫男女摠若干
人公務於自修不喜著述惟義理講說略見於師友
書尺亦可以見公學問造詣之一二矣李公舉以爲
知覺氣也是非理也以知覺爲心之用以是非爲智
之用公與書辨之曰來說是心性兩用理氣互發之

屏溪集卷之五十一
論也心是摠稱其體則謂之性其用則謂之情情之一字兼知覺與四七而言也知覺上也有理有氣四七上亦也有理有氣知覺與四七皆心之用心之用即性之用不可分而言之又嘗與韓德昭書論未發時氣質善惡之說曰高明以人心之無思慮作爲者謂之未發而未發之時氣質善惡則自在夫未發者寂然不動而湛一虛明之謂也若以無思慮作爲者便謂之未發則衆人之心雖無思慮作爲其氣質偏駁善惡不齊小則昏惑紛擾大則淫邪凶慝千頭萬緒森然錯在於方寸之間若此者其可謂寂然不動

而湛一虛明乎未發二字恐不可以無思慮作爲者而盡之也或於霎時之頃不知不覺而萬念俱靜一心虛明有以純乎本然之體是真寂然不動湛一虛明之時而聖人之大本亦無以過此其辨人物之性不同之說曰太極超形氣之稱五常因氣質而名者乃高明獨得之見也若以太極謂在形氣之外則是太極懸空獨立矣謂在形氣之中則與五常有何分別若以五常謂不雜氣之性與太極又何分別以太極與五常俱在形氣之中而不雜形氣則是不免爲二本愚謂太極是人物之性也性是人物之太極也

五常是性之條理也太極是性之尊稱也以此而單稱則爲本然之性而人物之所同也以此而兼指則爲氣質之性而人物之所異也李公末乃與公歸一而韓公則終不相契今余備書之以俟知者知之爾公稟性寬厚處心和粹言動舉止自然近道纔及成童已有向學之志至晚暮益大肆力其自知而自治則雖在微密之地念不萌於苟僞其接物而應事則必欲循乎天理心不移於流俗和而不流於柔弛嚴而不至於刻厲是余所以服公者也以公之心之德門路旣的躬踐且篤若假之年以卒其業則所就曷

可涯量只止中身奄拋素志此已可悲而第以公平日所學得以時措上而補君德之闕失下而正淑慝之是非者豈淺淺哉亦以臺端末位立朝僅四十日言又一不見施不但公命之奇也終亦世道斯文之不幸也歟銘曰

所貴君子維德在己思傳攸尊畜象之以先生曰吁吾見多矣德性渾厚晦甫其最暘谷狀公亦以德蔽行旣純美學又泛博師友講論義理昭晰望隆外內諸公交薦名登仕籍旋復大闡士類相賀屈指筵選地僻官閒間赴郵丞時遊錦茂山高水清政簡閉戶

我讀我書痛慨時事歸不虛徐新服變化臺 召寵
紆出處攸關首曩師誣 聖誣之辨討逆必先忠肝
義膽奈歸空言時已無為獻可亦病一疏畢忠有懷
欲罄半藁三臯抱歸耿耿人爭來哭慟為世道近侍
疏聞 上加嗟悼立朝論事餘一月日其視所存不
足萬一斷牘殘篇僅若干卷平生講說認見一穢先
狀後碣兩友書特其庶知公可示于億

贈持平姜公墓碣銘

蓋當 肅廟己巳姦兇秉命 聖母遜于私第兩賢
出文廟尤翁受後 命時則有若姜公諱眩慨然歎

曰此豈士子應科時耶遂不就公車人或問之公諉
曰科第所以悅親也吾二親不在何用科為有時引
滿悲憤之辭屢發於吟詠及甲戌夏化公躍然喜曰
吾可以赴舉矣屢遊場屋而其終不做則天也蓋公
性至孝能終身慕父母鄉人頌其事 肅廟聞而嘉
之 命贈司憲府持平嗚呼忠孝本無二致叔季衰
薄求之一節未易多見况並有而雙全者乎若公則
以王祥之行兼董養之義豈但為獻子加於人一等
而已哉公字仲明晉州人遠祖民瞻開國男殷烈公
在勝國禦契丹有大功立祠于晉我 朝有諱天命

厚澤集卷之五十一
禮儀判書大提學判書生觀察使隱觀察生少尹諧
少尹生大司成老清德雅望爲一代名臣大成之子
曰監正叔淮監正之子曰府使熙臣有學行高祖諱
繼胤直長 贈承旨曾祖諱義俊以行誼 除教官
別提皆不拜遺戒勿書官銜祖諱謙丁卯胡亂薦授
白衣從事不起丁丑下城屏迹湖海不復渡漢自號
南齋以寓向 南朝之義 贈執義考諱後望孝友
純篤妣江陵崔氏其考文濟闔懿克備公胚胎前光
以 仁廟丙戌三月十三日生公自幼父母病色憂
不離側十四喪其母哭不絕聲父恐其病止而不能

得目疾幾失明母之糲奩藏書篋時閱而悲不自
勝以父命留漢師業工令數月輒一覲猶以遠離庭
闈爲憂未幾歸侍鄉廬專意就養日置酒招會鄉老
以娛親父病藥粥茶湯親自調煎所居室秤薪躬藝
嘗糞禱天久而不衰疾病斫指進血及喪毀幾滅性
日上墓攀號王哀之栢幾枯每值夫日哀痛過節終
夕不與人言笑雖隆冬到老不廢澡浴婢使亦令澣
濯銜枚毋敢喧譁祭畢烝盛諸品一一衡驗有或不
潔痛加剋責己自榎楚於廟門外家人惶懼不敢不
盡誠一姊孀無依竭力供奉事之如母庶弟妹七人

屏溪集卷之五十一
養育嫁娶立田宅俾成家業又好義急難歲飢賜恤甚勤鄰族皆歸之列釜鼎爨粥食以待丐者平居自持甚嚴閨門之內斬斬如朝廷雖子弟亦不敢仰視男僕不得入中門好讀書詞藝夙成文谷金公即公中表叔也嘗贄文往謁金公亟賞之曰後輩中未易得也喜譚朱子綱目古今治亂賢邪進退上下揚扃如誦己言淡於趨勒法常曰少時臨帖若足跟之力皆到以是字畫勁健毫翰流動人皆愛玩年六十二丁亥以病卒于京第即十一月七日也翌年正月葬于廣州學堂村負壬原從先兆也前配慶州李氏將

仕郎慶棐女參判廷馨曾孫貞靜端潔有女士風生于丙戌卒于丁巳葬海美西長旨洞向午原後配慶州金氏通德郎澍女縣令震賢孫冲菴先生六世孫莊淑靜一事君子無違色教子女以義方前配有三女視之無間已出生于壬辰卒于丙戌與前配同原而向丁三男允泰早歿行遇進士行鼎生員皆有文學篤譽四女適士人李昉權道行李恆躋奉事尹心雄側室二子允隨行謹進士二男長進士審言出爲長房後次進士弼言生員男得言早歿李昉男彥彬二女適羅重徵申泰清權道行繼子聖迪女適李復

屏溪集卷之五十一
華李恆躋二男昌臣昌德女適吳命通奉事二男宗厚早夭宅厚女適李晉祥內外曾玄摠若干公之女八余門爲仲兄低面有通家好知公且詳嘗從唐城士民草公行聞于官今見審言所爲狀皆前日已覩聞而蓋無溢辭焉公資性端良風儀粹朗以聰敏之才工博洽之觀喜讀四子程朱書雖不以問學自居專用心於內犁然有自得情慢之容鄙俚之言不設於色辭尤謹於幽獨得肆之地嘗曰惟忿與慾最難制尤宜用工作懲窒二箴以自警每讀書至古人早孤處輒廢卷嗚咽不忍成聲可見孝愛之根於天得

而已已一着尤人之所難能實與南齋公丁丑後遯世同一義意豈不奇哉嗚呼人有五倫公能全其二推類可知其三於是乎銘銘曰

嗟公之世簪紳彌貴比數三代尤光厥燬學術行誼又巍節義寔至于公其孝自性養體及志至誠且敬既篤其源百行其餘屠維自靖君子早譽褒隆栢府身後追除最惜文學數奇莫展貽厥在後庶幾必闡我鐫其隧百代可見

直長鄭君

秦河

墓碣銘

烏川之鄭固東方大姓而有松江文清公傑然拔萃

屏溪集卷之五十一
高風直節震耀人耳目松江之後又有清古峻整如
抱翁公卓犖瑰奇如太白山人君寔松江公五代孫
而承祀二祖君之世猗歟盛哉山人生正郎 贈吏
曹判書諱游娶監察 贈判書沈若溟之女 肅廟
戊午十二月十八日生君君重厚周慎蔚然有古家
風既長游於寒水齋權先生之門內則判書公教訓
之嚴外則權先生化導之勤交勉以松江公志業君
篤承父師之戒益信家學之正每自勵焉年五十丁
未爲大夫人屈始登上庠俄拜義禁府都事換 明
陵奉事陞司饗院直長未及謝而辛亥十二月九日

卒得年五十四嗚呼短哉葬于堤川月林先兆有形
家言再遷而皆在月林其原向某君事判書公視其
志判書公築室於墓下有終焉計君遂絕意榮進左
右服勤整理家事延接賓朋皆有成法不爲判書公
憂如是者數十年晚大夫人病就醫京第非素志也
作事必務敦樸持己必要簡正末俗喜典忍君獨超
然也君諱泰河字聖運松江諱澈相 宣廟開號寅
城府院君抱翁諱澆朝廷待以殊禮官進善山人諱
普衍自弱冠學于宋先生挈家從之先生每謂志大
才高其進無量不幸早夭是君曾祖若祖松江第二

子府使諱宗溟早魁文譜松江羅黨籍屏廢至癸亥
夏化先誣既伸公始登瀛壽又不永於君爲高祖也
君厥有再室完山李氏直齋箕洪之女甚有婦道舉
一男曰槩二女適士人李潭進士趙德錄某郡崔氏
天柱之女舉二男曰槩曰梨進士猷煥金樂淳李真
源妻槩出二子幼槩出一女李潭出二女趙德錄出
余老且病久廢鉛槧以公狀來請銘余嘗獲私於
判書公退與君兄弟游講服松江諸公風烈素矣義
何敢辭乃爲論次而繫之以銘曰
巍巍松江殿虎班鸚抱翁侃侃山人卓卓公承其後

思趾厥武內外襲訓嚴師賢父質厚材良宜壽宜顯
斷遐屯亨孰爲善勸義川之陰月林其邃四世于此
昭穆以位全而歸之有闕其藏其友識之揭此銘章

縣監正菴李公

顯益墓碣銘

昔鳳九隅侍先師寒水先生之座先生曰見李仲謙
陽明辨否對曰人與辨俱未見先生手示之曰覽此
仲謙其可知也鳳九謹受而讀之果博學之真儒也
後幾年訪公於終南下時公出宰月浪已有行期講
義若干語全在人物五常之論此目下士友所爭也
相與告喜曰義理之論彼此沕合從古而難今日吾

厚溪集卷之五十一
輩非少幸也他可商者當俟北還之日不幸其翌年
公以柩歸余亟往哭之萬事已矣嗚呼悲夫公諱顯
益仲謙其字自號正菴世宗大王別子廣平大君
璵十一代孫僉樞贈判書諱厚載獻納贈贊成
諱迥進士贈參判諱時輝通政郡守諱泓公高曾
祖彌妣淑夫人朴氏其考主簿銑公以肅廟戊午
三月十日生未成童已有遠大志讀書能究蹟精義
因親命黽勉赴舉擢戊子生員壯元不復事公車專
意經學庚寅除寢郎翌年丁外艱憂闋拜王子
師傅今上在潛邸時也三日請一講學輒曉釋微

奧丙申陞主簿旋移工曹佐郎公會已通擬講職銓
部欲置公臺選知公有優養意即除鎮安縣監公
至則曰民社之憂既重一日有一日之責治縣治國
其道一也所以正人者一以正己爲先撫民慈御吏
嚴清約以生威公明以理事益損粟谷先生鄉約擇
鄉士老成人爲約長每月朔讀法講信籍民善惡勸
懲之如先生之於西原也定塾師教邑子弟月再會
校宮講經史拔其尤親自教授置里射長間三日會
武士教射孟朔都聚縣庭試藝論賞作吏民隊具戰
袍器械備不虞勸民力業耕桑無種與牛者使相假

屏海集 卷之五十一
貸戶種桑每春爲率閭境歡欣風動庶幾丕變而公
遽病矣竟以丁酉九月二十三日卒于縣齋爲政纔
一朞有餘邑民哭甚哀士子有加麻者縣曾有異政
者立祠祀之至是以公并享焉十一月窆廣州光秀
山庚子遷于陽智縣北定水里良坐原公配羅州朴
氏通德郎泰夏之女治川公紹六世孫後丁未沒葬
公同兆差上數步有三男一女長剛中縣監次黃中
龍中今尼城德山縣監女郡守柳恕剛中二男商運
商進今咸悅縣監三女沈顯之郡守徐有慶參奉魚
用福妻黃中三男商穆志學早幼商肅商默一女徐

有烈妻龍中四男商協天商恪二幼一女金履寅妻
柳恕一女適金宗喆商進男志順商穆女適金履命
餘皆幼頃戊寅 上幸養性閣愴然 教曰予曾從
師傅李某受大學於此遂命開 筵講大學 詢公
諸子存沒有以剛中已死聞之者 上嗟惜久之
命錄黃中 除寢郎 聖上尊師重道之意跨越百
王而亦豈非公之經識有以淡契於 聖心而然歟
公稟資醇粹才知透明又能沈凝善思索看書有得
不以爲足必左右研精直求正義上自經傳下及濂
洛諸書且讀且思不明不措終亦隨書立說多所發

揮後來先儒之說或有異同者皆辨其得失曰尊畏
先輩明辨道理當并行不悖異端邪說之病世害道
者莫不劈破頭腦剔抉謬誤與朋友講說或不合至
屢百千言不已論議博洽各極其趣早遊農巖金先
生之門最多講說金先生謂仲謙多與余合其不同
者往往屈己而從權先生亦稱其通透灑落斯文諸
先生之推譽者如此晚嫌陳饒之或偏於道問學也
平居整穆終日危坐集古賢聖持敬說作爲四圖默
玩以自省欲以延平簡嚴上蔡無欲融爲一法而又
南軒所謂有所爲無所爲而爲者必嚴其辨以明王

伯之分庶幾博而約之以會其極嗟乎何天之奪之
速使不得益究其成也公之論學積累百編不可一
二說最其論心性曰五行之氣聚以爲身性者五者
之理也心者五者之神也質者五者之氣也性即神
之主神即氣之精質即性神之所寓也性無不善神
無不美質則雜矣心之本體雖無不美而質既如此
故其用或不能不流於惡矣其論四端七情曰四端
以性言七情主心言四端之發固是心而至曰仁之
端義之端則是專以性言也七情之用固亦本於性
而曰喜曰怒則是主乎心言也性是理心是氣則四

端當屬之理七情當屬之氣又曰七情包四端以七情之善便是四端故也人心包道心不得以人心之善只可曰人心而不可曰道心故也其論未發工夫誦朱子平日莊敬涵養之功至則其未發鏡明水止其發無不中節語每有味而自得焉者蓋是書之意謂此心常存敬畏則不但心之所發自獨知至應接事物無不中節雖靜而至於不覩聞未發之時只可見鏡明水止之體云公之有得於此者實以其意與章句本旨無異也又言其明止之體則曰寂寂無一毫思想惺惺無一分昏昧此可謂未發盡到前後諸

儒之論多誤於此而惟公獨不失朱子正義此何止公見識言議之爲得正可以見公工夫造詣之愈微愈密也如陽明之指氣質爲本性以良知爲天理整菴之認道心爲未發混理氣爲一物亦皆著說以辨之然陽明任自然禁下學終爲吾道之亂賊則斥之爲儒名而禪學整菴是正學之有出入者而其闢佛之功莫非明朱子之學則只辨其論議之不純而猶謂以尊其人學其學公稱物權衡之公此可知也至近世或毀朱子註或亂禮經書或挾己怨誣尊師實爲斯文世道之變而類多以私意亂其是非公以爲

雖并世之人心公識明則是非可得以定何必俟百世乎遂并著書辨之嘗曰丙丁以後儒者出處當以春秋復雪爲主至今婦孺走卒之賤莫不知復雪之爲大義者其惟宋文正之功乎一時賢士所與遊者圃陰金公昌緝黎湖朴公弼周其最也又與三淵公善公沒三淵文以誄之曰沈潛愨實勇於擔道剖析入微靡有罅漏公之在月浪淵翁南遊馬耳山川見公居官莅民歸謂人曰近世學者鮮兼有政事才善乎仲謙之爲政也公少有遯世志得外仙游洞一曲與尤菴先生講道之華陽隔嶺而近愛其水石幽潔

剔榛莽築書室名其齋曰天山峯嶂溪壑無不題品暇日輒一至或靜坐以養心或徜徉以舒懷經旬月乃歸蓋公親老欲一得專城養歸而冥棲終不得遂其意悲哉余與公僅有一日雅暫時講論幸其相合而及見公遺文論學大體或有不合而其合者多即今吾道日孤言議多歧每傷當時北歸之無日未罄其底蘊也今明府兄弟與商運來謁銘以公文學經術止於強仕之年不顯於世無事業得以稱之最其義理之論可示於後學茲撮而書之石後之覽者庶可知余之意云銘曰

聖人之學德性是尊其性維何五常粹然謂物同稟
人獸無別公主偏全章句爲說人性最貴經訓斯晰
聖人之事春秋莫大胡元學士昂而剝變猶稱大儒
華夷何辨公言直斥爲昧尊攘寧無所受實惟文正
明理崇節寔第一義羽翼斯道亦此二事知爲行先
行又知重表旣自裏體必著用先後輕重本末次第
體之于身敬以終始門路旣正勉勉自強中世所就
己至高明惜乎今亾學未大施猶有文字庶後來垂
欲知公者惟此可知

谷山府使

贈兵曹參判安君

相漢

墓碣銘

谷山府使安君相漢字漢卿竹山人也其子兵使允
福以其狀來曰先人之墓木已拱未遑牲繫之文乞
有以敘之余曰諾狀中所稱梁夫人卽余從祖姑母
之女子子也而先君爲其所後呼余以叔余觀今世
蘇韋之士習趨競而少恬介滔滔乎忘廉冒恥先君
獨於其間端潔自守羞與徵逐余嘗多之以此而所
好不但媼戚之好後事之托烏可辭也其譜曰安氏
之先麗朝少府濬爲鼻祖其後有三世三重大匡逮
我朝叔老西北面都巡問使 贈判書望之觀察使
孟聃 英陵儀賓歷五代有諱應洪遊栗谷牛溪兩

先生門以行誼見稱即君高祖 贈執義諱大楫

贈承旨諱廷煒曾祖與祖也承旨公有二子長曰郡

守 贈承旨諱紳次曰水使 贈參判諱績郡守公

娶全義李氏參奉耆貞其考也以 顯廟甲寅五月

日生君君於序爲季水使公取以爲子公前配李氏

義安大君和之後學生日新之女梁夫人即其繼配

也籍南原考通德郎益壽兵使應涵曾孫也君自桑

弧時已有丱駕意少爲諸生治舉子業己而投筆取

己卯科蔚然有雋望旋遭郡守公喪憂吉由宣傳官

訓鍊院主簿都摠府都事經歷復入訓院爲僉正副

正陞礪山營將君以事辭不就則 朝廷移拜內禁

衛將蓋選也北虞侯缺 上命擇其可者君與焉一

年而丁水使公憂哭泣如禮梁夫人懷抱幼孩惻然

在疚君備志物之養篤友愛之情人無間言間爲楊

根郡守以微旨罷不赴旋拜豐川谷山府使君爲政

鑿鑿有條理覈糶明簽丁常使官儲有羨餘在豐川

捐財買田以優新舊送迎民至今賴之名其田曰安

公田明於聽斷府有十年滯獄君察其寃竟直之囚

叩頭感恩願爲奴服役君曰是吾職耳何有於爾哉

一日忽有寇訛民大震君令曰有敢動者罪之府中

遂帖然在谷山歲大侵君竭誠賑飢民無捐瘠繡衣
上聞有賜帛之命君在官輒修飾廨宇廢圯者易
而新之谷山則大小二百餘架募丁食功不煩民力
輪奐之盛甲於一方君可謂范天使之好官員而監
司欲據實褒聞君固辭而止是尤俗吏所難也君
所至多茂蹟如此民輒勒石頌其德庚子以大邱營
將入拜羽林衛將十月五日卒于家年四十有七葬
于沔川北石潭枕子原從先兆也配泗川睦氏府使
昌胤女事尊章以誠處妯娌婢奴之間雖有酸鹹之
異終無方圓之歎梁夫人所抱一子夫人親自鞠乳

恩愛備至梁夫人常語子曰汝以嫂叔之義實兼母
子之恩在西邑嫁女君曰人家窳約有時而吾有二
妹不可異同宜從今省儉夫人惟君言是聽無難色
梁夫人老而病風痺轉側須人夫人親自護持晝則
替進饌匙夜則侍寢察候雖一宵十起不少怠時夫
人亦年迫七耄子弟悶其憂瘁請以身代夫人曰吾
猶可自爲不許久而彌勤十年如一日及梁夫人喪
哭泣叫叩哀動傍人蓋其孝性也婦人之懿德可謂
備矣而君事親之誠刑家之法有所觀感而然也生
後君二年年八十一丙子卒于允福竹山官衙葬于

天安可巢里向卯原寔水使公瑩側也後以允福恩
例 贈君嘉善大夫兵曹參判兼同知義禁府事訓
鍊院都正夫人貞夫人一男卽允福一女適牧使柳
世復側室二女爲李宅休妻南夏行妾允福二男宗
奎牧使宗翼早歿二女趙心泰李潤光妻柳世復一
女兵使李潤德繼子燦營將李宅休一男一女南夏
行二男二女宗奎一男樸宗翼一男櫛孫曾摠若干
人水使公性嚴遇子弟不少假每賞君孝敬事難疑
輒進而咨之君酒戶寬嘗過觴而刑人濫伯氏公有
言君終身以爲戒無過一爵君屢典州府人私謂曰

何不爲子孫計也君曰是在子孫賢不肖如何耳置
田宅何益哉甚矣其言似疏太傅是蓋謹篤之性廉
介之操得於天賦而然矣余曾喜君言辭詳靜舉止
從容口不出進取語其不由儒士門路自然有默契
而暗脗者如此不可以囊韃少君矣有老將閱人多
而少許可獨稱君官不稱所抱此可謂知君也銘曰
其貌如士其性如玉人驚我聞人黔我白若仲翁言
田宅何益有或不信視徒四壁再縮西符利器盤錯
閫鉞須君驥步中踣斂歸三尺沔水灑灑老我琢辭
用示無極

屏溪集 卷之五十一
君沔川之葬久有形家言允福將欲溝君墓而遷之以湖西節度使卒于官齋志未就其子宗奎承遺意以甲申十月二十五日移窆于鴻山縣北金枝洞坐酉之次夫人耐焉允福之兆亦十里而近宗奎請紀其事書于下方如此

贈參判金公

泰魯

墓碣銘

昔歐陽子幼而孤事其大夫人鄭氏龍崗之阡表父之德本之於大夫人之教其言可徵而其事可悲也吾友金觀察士重生壬申而其考 贈吏曹參判諱泰魯字聖瞻以其年六月一日年二十五卒其母姜

夫人茹哀含痛艱難鞠育既長勗之以先人之事以及於其孫其孫參判鍾正將樹牲繫之石於公之墓自爲狀來謁余文其言亦本於姜夫人如歐陽子其事尤可悲也公右參贊 贈領議政文敬公厚齋先生諱幹之子蓋敦孝才敏人也母朴夫人嘗病疴殆移寓鄰屋公躬負以往不許人代歸亦如之治文詞先生時加斤正公言下開悟後爲文輒稱先生意是皆姜夫人之言也又長於趨勒斷簡零墨至今遺在者勁健得王氏法云公既有美質生於詩禮之門又多觀感若公而年宜有成就可見苗而不秀遺事之

屏溪集卷之五十一
可傳者寂寥而止所謂理者不可知也雖然刑家之
範著在閨闈以裕後昆於姜夫人可見矣夫人系晉
陽其考教官竹隱堂諱錫夏文良公私淑齋希孟之
後公之喪也士重方在牀呱呱夫人未忍引決哭擗
幾滅性喪闋猶衣垢容慙六十年如一日事先生孝
先生五歲寢疾滫瀡之供非夫人手不進也夫人必
躬調饔進牀下默察匙箸加減爲憂喜旣撤立戶外
以俟更進先生疾漸瘳言語轉澁傷人莫能諦解夫
人以意逆志是先是承僂身悅口無往不適先生曰
備善事我也先生易簀夫人號痛如孺子慕晚寢早

作親執饋奠一如先生在時尤篤於祭祀之禮邊豆
諸品豫辨別儲又嘗節縮家用以資先山隧石之費
教士重不專於慈而以義方士重嘗以諫長抨賊臣
竄海島夫人無戚戚容書戒以操心飭躬士重還書
鍾正曰母氏一言一字皆至訓也誓將承奉毋忝所
生云夫人治家井井有法度內綜鹽醢外管田圃罔
不齊整急於救人吉凶之助飢寒之恤恩意曲至親
黨臧獲莫不歸心士重成立於孤露之餘歷敷清顯
公則未之見而覃恩之榮克賁泉臺夫人受真話食
其祿不幸士重遽歿於官夫人惇惇無生世意竟以

戊辰十一月二十八日終壽七十九有遺戒在篋皆修身篤行惇親崇儉語也是豈俗婦女所可及者哉公葬在廣州沙川先塋枕卯原夫人同兆而異窆公清風人世德在先生碑朴夫人陰城名閼其考孝子贈參判諱浩遠有諱淳判承樞諡忠愍事在國乘幾世祖也士重名致屋二子長卽鍾正次鍾直早坳郡守尹心緯士人李齊淵二女婿鍾正三男尚淵會淵一幼尹心緯一男健厚李齊淵一男一女并幼嗚呼人生百歲謂之上壽而公之年不及三之一何其短也然以先生爲父以士重爲子而夫人之賢又能誦

而傳之使公孝懿之純才調之美綽略可見於後是不但爲歐陽子之崇國公也視世之上無賢父兄下無佳子弟壽而無傳者又何如也余與士重交好甚篤殆古所謂姓不同兄弟也熟聞夫人德善余之子爲士重甥益知夫人事先生爲賢婦教士重爲賢母以勤儉貞一御其家而家道立蓋陳孝婦萊公母之儔也吾不知他日職乘禱杙者其將採夫人之事書之簡冊如古太史氏否士重文學器識爲世名臣有公輔望未究而歿今鍾正登文譜羽儀 清朝諸子皆蘭茁其芽噫夫人亦知公之必將有後如鄭夫人

也耶宜其然也銘曰

維公之行蘭折猶香夫人之德彤管有光斂此遺芬
一邱雙玉我筆亾媿瑩珉如璧

僉正李公墓碣銘

念昔光海敦倫潔身避遠甲子逆亂糾旅剿捕是真
守義效忠之人而世不甚知位不過庶僚知之者皆
惜之即其諱廈字叔度我 獻陵別子敬寧君謚齊
簡公諱祚六世孫齊簡之後詳 璿錄不須譜而至
諱磁以咸平都正諱瑱之子族始踈進士縣監 贈
參判參判子獻納諱弘仁寔公考也妣陽川許氏都

事濟女右議政琮之曾孫公以 萬曆甲戌十一月

二十三日生晚中司馬癸亥改玉特授 光陵參奉

平陞奉事用都監勞超拜主簿由監察出監鴻山縣

歸又以監察轉軍資判官司饗提檢扈 駕入南漢

還都陞掌樂僉正卒官翊衛司翊贊告老棄歸安城

鄉廬壽七十六己丑之十月十六日卒始葬鎮川後

移天安西可蘇負庚原配延安金氏縣監德源女後

葬祔公舉七男益繪益煥益馨益奎益華益亮益珍

直長二女進士黃德涵縣監金擘妻益繪子諱益煥

所後子諱益馨子諱訥訥諱益奎子諱諗諗諱益華

無后益亮子說誼奉事詠益珍子譽謇誦男進士
啓鄰誦男世鄰俱有文名餘曾玄不能盡錄公成進
士廢 母之論發於榜中即走楊州墓下自靖不復
入都門適亂公守 光寢倡維楊諸士糾義旅捕餘
賊功不自售在殿中時鄙爲持憲者其詣臺不肯迎
接因推絨舉廳規直其說人稱快莅鴻臚俸料理兩
歲減田租幾半惠政多類此以微事罷民甚惜之噫
忠義之節貞確之操誠爲後人所欽服蓋聞公早事
沙溪先生退與潛谷金公墳月塘姜公碩期竹窓李
公時稷松崖金公慶餘相友善其觀感於從遊之際

者豈無所得語曰不見其山見其草木公雖不顯於
世觀於公師友之盛其可以知公也歟今世鄰子澳
以公狀來余謁銘屢懇不止茲撮其狀謹書之如此

銘曰

銀璜流慶乃文乃行造士遜荒葆我天常 王曰嘉
汝旌以寢郎惠騰湖邑世稱循吏一轡以推全鼎斯
在蘇封峨峨有煥貞珉揭此潛懿詔爾後人

通德郎朴公

暉

吉

墓碣銘

傳曰言而民莫不信君子一言九鼎大呂若故朴公
諱暉吉字應孚同春宋先生嘗謂操守之確踐履之

厚溪集卷之五十一
篤吾輩所不及苟非積行之實爲朋友所服先生何
得以稱焉後之可以知公者其在是歟公務安人高
麗尚書左僕射諱暹始見譜書圭組蟬聯至諱允慎
諱彥諱淳源皆國子司馬世傳文學寔公高曾祖也
考北道評事諱衍妣恩津宋氏球之女雙清堂愉之
後以萬曆己丑三月日生公幼有美質不作遊戲
好讀書評事公奇喜之每授學必使學聖賢爲志公
割身厲精輒有亦若是之意時評事公一歲九居魁
蜚英榮塗公又文翰早成聲名伏儕友發解凡十二
一世皆豔歎當光海政亂權姦用事評事公以直道

黜北關公奉母夫人歸唐津鄉廬杜門講學以避遠
癸丑夏丁內艱秋評事公邁疾歸疾病割指進血終
再哭巨哀戚易備至啜粥三月廬墓二冢因致成疾
嘔血羸瘠見者危之戊午彝倫敦敗公絕進取意晚
又僑居于懷德之瓦村九菴同春兩先生副學金公
慶餘所居密邇公忘年托契講討以爲樂諸先生亦
咸重公乙酉三月五日以舊疾竟不起得年五十七
葬于沔川北大德洞丙向原先兆也公配南陽洪氏
水使昌世之女有女士行動儉治家不以鄙瑣累公
篤學之志待客有剪髮之美尤致敬於奉先雖大耋

厚溪集卷之五十一
後遇祭祀必早起衣明潔魚果蔬羹親執不使人代之晚年孫曾滿前嘗曰吾之不死乙酉專爲汝輩今以獨享爲疚懷也庚申享年八十九而卒祔于公墓四男洪一咸一善一僉樞行一都事四女適 贈大司憲權休監役尹鳳舉同樞朴承申判書尹堦洪一男璜女金翊周許炳安翊妻咸一男珽瑄城女安重熙閱得重妻善一男璨璉瑒女閱挺弼崔燭妻行一男璟珪琇女申潁慎緯相成大齡妻庶女尹天民權大憲男同樞懿僉樞諭認應女適金暎縣監俞命夔進士尹擇林泰亨尹監役男進士措朴同樞繼子文

古尹判書男大司諫世綏牧使世緯世經女適縣監李衡輔府使宋相維內外曾玄多不盡錄摠數百餘人其顯者尹大諫子承旨涉判書汲也嗚呼公容儀端雅性度清真平日不廢晨謁將祭必先期齋沐盡誠禮推至於遇宗族處鄉黨莅僮僕款洽溫恕無怨惡常一言一事必念遺戒謹慎自持亦皆孝之餘也一室圖書俯讀仰思不知老之將至遠近學子聞風而來戶屢常滿孔子謂孝悌親仁餘力以學公其庶幾乎以公之才之行無年無位不一施之知公淡者豈終無憾然春翁一言足以闡發幽潛又其後承繁

衍將有以光其遺範爲善之報此可見矣善一兄弟
出入華陽之門欲以牲繫之文請於先生未及遺戒
必就先生脚下善一之孫東煥謂余私淑於先生以
所自爲狀與尹大諫所記表陰使其子炳來謁銘顧
此癯衰陋拙不敢當其言而義亦不能終辭茲撮狀
表謹書之如右係以銘曰
毀疾終崇而滅身兮斯可推而知其孝者耶懷瑾而
恥自售兮其有意於傷世道者耶懷川之麗澤源源
兮是以君子早有鄰而不孤者耶沔之石百世不泐
兮嗟爾昆於此而謹稽也哉

贈左贊成金公

斗光

墓碣銘

公諱斗光字子輝鶴洲金公諱弘郁之孫也鶴洲公
忠節炳然感動神人宜其庇及後孫是以他支蕃茂
而公內美旣具年未三十而沒子姓又數世無章人
或致疑於司命者之權矣今公後孫玉潤金章而漢
耆篤生 聖女八膺 翟瑜之選正位坤極以基王
化蓋積之厚故發之遠矣孰謂醴泉無源靈芝無根
也福善之理如執左契而公不食之報亦可以見於
此也歟金氏系月城新羅國姓始祖諱仁瑄高麗太
師八世至自粹都觀察使號桑村我 太宗大王以

官徵之效死罔僕有諱好尹 贈左承旨諱積察訪
贈吏曹參判公之高曾祖也鶴洲公 孝宗朝以海
西伯進應 旨疏論姜嬪獄事致 上怒遽震身殞
桁楊 德音旋下昭雪無餘後 肅廟復贈公吏曹
判書諡文貞公考諱季珍官縣監靜養邱園無進取
意妣居昌愼氏僉知暉之女左議政守勤六世孫以
甲寅十一月二十五日生公公生有美質孝愛之誠
出於天性自孩提時遊戲膝下不離側出而得一味
輒袖而歸遺父母及長親有病則衣不解帶憂形於
色藥必親嘗食必親在晝夜扶護復常始退私室有

一姊敬愛甚篤而推其愛視諸甥若己子待宗族親
知一無緇磷和樂愷悌人以是莫不傾心愛好性且
澹然雖平日寶愛之物人或請之則便與之無吝家
業素饒而不喜華靡大布絺薦處之晏如所謂謙恭
自牧淡泊自守者非耶先公屢舉不育公自幼善病
不以課學督過而自能悟達其爲文條暢無艱澁之
態翰墨亦隨意飄灑皆可爲而初不用力先公嘗歎
曰惜乎病也使之盡其才則足以昌吾門也壬午隨
父母入京師以其年七月十一日病不起年纔二十
九人莫不嗟惜初葬廣州桑村公墓下後移瑞山雙

峴丁坐之原配李氏系出 璿派邊城君繼連之後
通德郎斗爝之女婦德甚備奉舅姑盡其誠事夫子
必以禮及舅姑歿持家御眾亦遵成法奉祭祀不事
豐侈潔而且旨理家產切戒鄙齋節以使裕兩孤兒
在穉年而課書甚嚴使不敢遊惰尤以飭行爲重諄
諄教誨者常在於修身立名以不墜舊家之聲槩之
舅姑在爲孝婦夫子在爲順妻教子爲賢母鄉黨之
稱以賢婦人者誠有以也生於壬子沒於庚子十一
月十三日附於公墓後己卯 大婚漢耆卽拜領敦
寧府事鰲興府院君以其顯 贈公崇政大夫議政

府左贊成妣貞敬夫人公有二男長運慶次選慶參
議女士人李夏瑞運慶三男漢禧生員漢祿有學行
漢祚天女生員鄭存慎選慶四男長卽漢耆次漢耆
漢老一幼三女士人申景若洪相休李 李夏瑞
四女承旨鄭存謙士人金載敬魚錫文漢禧三男獻
柱勉柱德柱出爲漢祚後者其季也一女幼漢祿三
男懿柱熙柱一與二女幼漢祚一女幼漢耆一女卽
我 聖妃二男龜柱麟柱漢耆一男一女幼內外孫
曾多不盡錄公世居瑞山之太橋一村數十家簪裾
蟬聯桑柘掩翳世之稱湖右士大夫者必以太橋之

金先數焉蓋桑村公守志於先鶴洲公著忠於後以立其基本潛德幽光世承其休而公又仁而無壽故天之報施者不于其躬而于其後子孫振振衍祥塗宮慶我邦家光輝赫煥將以見德善之流無窮也斯可以為銘銘曰
使福壽之在身兮百歲之間使慶祉之貽後兮萬世之傳嗟惟公之所得兮羌不可以易彼於戲石之不朽兮銘以示乎無止

牧使權侯

字亨

墓碣銘

侯諱亨字九萬權之先本新羅宗籍姓金有太師

幸佐麗祖開國賜今姓系安東其後世多名公卿賢德珪組磊落相望為東方甲乙族至縣監諱世仁牧使諱濟為侯高曾二祖而祖諱克履號德菴考諱欽皆有隱德妣李氏察訪俊老其考也侯以仁祖大王庚辰三月望日生早遊場屋輒居前列二十七丙子登國庠三十六乙卯捷明經第先是尤菴宋文正先生愠于羣小去國南歸侯在太學擬上章請留至是柄人嗾之屈隸芸閣人皆冤侯侯不屑也由著作博士陞典籍出為平邱察訪一心撫摩郵人頌其政侯不樂仕宦棄歸鄉廬敘為文兼宣傳官水曹郎

原溪集卷之五十一
監縣連山既遞坐微青編配湖縣久之拜保寧縣監
吏民服清慎歷直講八騎曹爲正佐郎以把守郎廷
尉問復有臺言遞陞司藝太常正除晉州牧使則
廟堂啓以侯鄰鄉泥之數年家食優閒復拜左通禮
申病免以丁亥元月上旬卒于家得年六十八葬于
所居宜寧縣北壯谷村其原向甲侯疑疑有氣槩連
山時姦凶竊命管蒯士類尤菴梓棘耽羅路出縣下
侯延奉盡禮敬及楚山柩歸中途迎護奠賻殫誠人
劫劫以爲言侯不之變竟以此罷士論多之此可以
見侯之所存矣配恩津宋氏司諫挺濂之女雙清堂

愉八世孫也有壺懿先侯一年卒與侯同塋三男壽
昌壽期壽祥四婿掌令崔慶從李仁老成舜徽進士
鄭相詹長房男翩翩璆女適金爾鉉鄭相點曹善迪
裴允徽仲房男翕翬習女適呂稿尹勉亨季房無子
子習女適郭弼漢鄭相奭崔掌令三男鄭進士二男
翻余同門友也狀侯行謁余記其事曰厥侈桓楹之
刻書屢往返請益懇文未就而吾友亾翬之子泌中
以亾友意來曰幸先生母已諾於逝者余乃投涕而
猶述其略如此銘曰

山高水長宜春之北鬱彼佳城云誰之宅軒冕之世

循良之蹟位較器淺命視德齋有屹其石有顯其刻
於千萬年我筆無忤

敦寧都正 贈吏曹參判朴公 起祖 墓碣銘

昔睡翁宋公甲祚當 仁穆聖母金墉之日以新進
士獨拜 西宮義聲赫赫相傳 孝廟朝同春宋文
正公白其事 命贈侍從官清陰金文正公以正直
之氣狂流之砥書于墓石其後幾百年又有水南朴
公諱起祖字起之嗚呼亦其人也歟我 肅廟癸酉
公登上庠唱名 殿庭及出悲慨不自勝獨詣 瑤
華門外拜 恩如例蓋 仁顯王后遜位私第時也

里塵父老爭來聚觀曰今日始知有 國母矣至有
出涕者宮人之侍內者聞新恩來拜送人問姓名公
終不言而退親戚知舊皆莫不爲公危之公則夷然
也公歿後相臣金公在魯筵奏公獨拜事與睡翁公
相類合有褒贈之典如 寧陵時事今 上屢稱奇
哉奇哉特 贈公吏曹參判 朝廷之嘉獎至矣獨
不遇清陰之賢大筆揄揚如睡翁公識者恨之公咸
陽人朴氏本新羅國姓幾代至麗朝樞密事信清始
見譜書後十世連登文譜皆長六卿入 本朝兵書
習與青川君沈溫同罹慘禍歷數世逍遙堂諱世茂

屏溪集 卷之五十一
孝陵初以諫官疏伸靜菴之寃士禍後第一疏也士
論躉之寃公高祖也曾祖郡守諱應立與伯氏判書
公素立從兄貳相公大立文章行誼并名于世祖倉
守諱知讓號陶村癸亥初與沙溪金文元公公弟潛
治公知誠暨數三名公同薦學行直授六品官考諱
由經早世妣完山李氏都事隆之女公以 崇禎甲
申後己亥六月八日生九歲并失怙恃執禮如成人
兄妹皆未嫁娶姑夫黃都正世耆取公鞠養一日見
公貽伯氏書叙孤惇契闊語悽切黃公爲之嘉歎曰
是兒年未及誦詩書辭曲盡情事甲戌夏化 朝廷

首除公 孝陵參奉人有爲公緩行者曰毋亟也必
有以陞之也公笑曰吾嘗媿夫無實地而延虛譽者
卽就職例遷典牲奉事繕工直長由尚衣別提戶曹
佐郎出爲義興縣監政尚右文士多知學同堂兄弟
有爭訟者公曉之如乙普明故事秩滿又加一年旣
歸民豎碑以頌之歷禁府都事刑曹正郎暫赴高城
郡守旋罷歸居數年得林川荐值大飢竭誠贖賑民
無捐瘠直指以 聞該部將加資級公力辭免俄陞
平山府使大臣爲言其治績不宜數遷及爪僑居新
昌之水南村與伯氏公暮年相依嘗邁癘殆林有業

醫者日馳二百里携藥物來曰郡之民士出騎羸糧
齊聲勸送云疾已差惠局郎復與平山治如林川歸
拜司饗僉正見北門禍作挈家還鄉 當宁初以漢
城庶尹水運判官推仲子侍從 恩陞僉樞五衛將
敦寧都正間嘗就養於長子朔寧郡衙乙卯閏四月
十四日卒壽七十八疾革盟櫛衣巾命正枕席儻然
而逝初窆朔寧樂隱洞改厝于龍仁雲噓谷向已原
夫人韓山李氏其考進士必晉土亭文康公五世孫
也柔嘉貞慎婦道咸備先公四年乙未生没于己卯
葬衿川加里村後祔公左四男聖輯郡守聖輅參議

聖範出爲族父後次聖輔二女長適徐徵世次適牧
使俞彥哲側室一男聖輻四女爲宋逮孫李景昌林
載虎權相奭妻聖輯二男思敬進士思儼出後大宗
一女適徐命真聖輅三男思道思教思義二女適洪
啓五洪絲漢進士聖範三男思堯思亨思禹四女適
奉事金思重李普延進士李運彬安榦聖輔一男思
欽一女適李性存徐徵世三男秉贊秉說秉傑一女
適韓光濟俞彥哲繼子漢鼎三女正言朴正源奉事
李克顯別提金和行思敬一男靜陽思儼一男晉陽
思道二男亨陽昌陽思教一男元陽思義無育以昌

屏溪集卷之五十一
陽爲子思堯一男普陽思亨二男理陽次幼思禹四
男孝陽悌陽餘幼思欽一男幼內外曾玄多不錄公
少謁土亭祠閱院長錄見李寰名曰是夫迎合廢
母論者之子也豈敢廁名於諸長老之列乎手削之
嘗宰嶺縣見鄰牧之獻諛棠座者心惡而面折之觀
察爲之調娛蓋其峻正激昂見義而不見利者素性
然也是以當倫彝壞喪之日不懼不撓辨得大節雍
容如茶飯事凶徒雖恚甚亦無奈公何豈不誠卓卓
偉哉乘化之夕夢睡翁來致款恰嗚呼氣類相感其
理不忒可異也已公稟質仁愛志氣端良以早失父

母終身哀慕祭則慤愴友弟兄恤宗黨居官勵冰蘖
之操接人削町畦之蔽羣行焯焯可書者多其高風
勁節可以掩之只存其大都如此云記昔辛巳余始
拜公於花山之子舍頎然長者人也仍與公諸子遊
及今星霜再周公孫思儼以其先人未卒之狀足成
而來謁余銘顧余癡耄棄筆研久矣義不敢辭遂爲
之銘銘曰

嶷嶷維公節義在躬無所爲爲 聖主褒崇夫豈前
人其美獨專世有職乘當并公傳仁人之行循吏之
風于公可略瞻仰斯隆山有時崩石有時泐公名不

磨螭頭有屹于秋在前過者必式

北兵使李公暉墓碣銘

有明朝鮮嘉善大夫咸鏡北道兵馬節度使李公諱暉字某卒於崇禎後再癸卯十一月二十日享年六十九明年正月葬于洪州府西鳳首山負戍之原其左數十武公祖府使贈參判諱焯墓在焉蓋從先兆也公生十餘歲失怙恃育養於內舅李忠肅公世華以公資質美智慮具忠肅每奇愛之公以儒家子負氣不羈不憚弓馬業年二十二擢武科先輩大人莫不器之除宣傳官值屠維禍作忠肅秉大節

破敗世道一變公罷官家食甲戌叟化復闡颺外內歷籌司郎司宰僉正禁軍將副摠管又宰海南谷山會寧沃川定州而七授閩寄黃海全羅兵使則未赴北兵使則再授再遞海西防禦使全羅水使慶尚右兵使實所莅也為郡東姦胥制土豪撫癘殘鎮閩嚴科條明賞罰養士卒在嶺營鑿江浚濠為萬世緩急備軍民刻石頌之在北邑誠信并行醜類莫敢侵侮上持降璽書褒之李氏系龍仁麗朝壁上功臣吉卷為鼻祖簪裾蟬聯代有聞人至我朝有伯持官都觀察使以清白著名績以布衣抗疏成廟御筆持

賜忠直二字仍以爲號官正言是有孫諱湛官副提
學經學行誼爲一代名儒而退陶李先生期與最重
學者稱之曰靜存齋先生寔公高祖也曾祖諱哲容
縣監 贈參判府使公以儒雅稱清白之操能趾世
美考諱廷俊 贈參判妣贈貞夫人富平李氏參奉
贈贊成熙載之女公娶晉州姜氏父某再娶延日鄭
氏父某俱無子取弟曙子齊嶮爲後生員一女適尹
得師鄭氏出生員有一子成翼公居家尚節儉不喜
芬華奉先盡誠禮老猶不倦身雖韜韜儒家遺規亦
可謂不墜矣性剛果不能容人過失以此人多忌謗

而末年益與世齟齬欲屏居鄉井優遊終老而病忽
難醫臨終無一言憾憾意長歌一曲道然而逝其平
生所存可見於生死之際者如此姜夫人初葬坡州
以辛酉八月某日穿公壙右同窆焉生員君以狀授
余而誌之余因念昔在己卯先君子與公同案司宰
公時過從於先君子余隅坐而瞻公頎頎貌矣俯仰
四十年間益歎先契之莫追今於生員君之托不敢
以蕪拙辭興感而書之云銘曰

不羈之志豪宕之氣求之赳赳尚或覲止奉先以誠
儉約自好雖在儒行罕與公肖矧公仕止與時伸屈

屏溪集卷之五十一
論其大體儘乎無闕靜祖肅舅歸拜無媿庶幾以銘
後人是示

屏溪先生集卷之五十

